



pepsi pipol



www.facebook.com/pepsipng



na painim aut moa long ol narapela promosenis blong mipla bihain taim.

Insait:

Ano Pala inap senisim toktok bilong K71.8 milien peimen - P2
Noken maus nabaut: Eluh - P3

Lukim ol poto bi-long Festival ov Ats - P14



Kaikai paia danis...

TRUPELA SAMTING: Ol lain bi-long kaikai paia bilong Niu Ailan i soim trupela kastom long namba 5 Melanesia Festival ov Arts na Culture long Pot Mosbi. *Poto Nicky Bernard.*



Vaki gat 2-pela rot: Kua

1. 'Arestim PM'
2. 'Sapos nogat bai yu asua'

Stanley Nondol i raitim

EKTING Polis Komisina, Geoffrey Vaki, i gat tupela rot tasol aninit long lo mekim long arest warent bilong Praim Minista Peter O'Neill, long hevi bilong K71.8 milien stet i baim long Paul Paraka loya.

Wanpela em long yusim arest warent na arestim Praim Minista Peter O'Neill o em bai no inap mekim arest.

Pastaim Minista bilong Jastis na Atoni Jenerel, Kerenga Kua, i tok Ekting

Komisina Vaki i no gat discretion o ful pawa aninit long lo bilong kantri long mekim disisen long laik bilong em yet. Em i gat tupela sois tasol long bihainim disisen bilong Nesenel kot.

"Ekting Polis Komisina Geoffrey Vaki bai bihainim arest warent bilong kot na arestim Praim Minista o em bai sakim kot oda bilong arest na kontemp lo bai mekim save bilong lo". Mista Kua i tok.

Mista Kua, em loya na i pastaim presiden bilong Lo Sosaiti bilong PNG.

I go moa long pes 2

2014

THE NATIONAL

MASK FESTIVAL

RABAUL JULY 16-20, 2014

PORT MORESBY 2015 XV PACIFIC GAMES
OFFICIAL CARRIER

AIR NIUGINI DOMESTIC TRAVEL VALUE

K1600 ^{PP} 2 NIGHTS TWIN SHARE RAPOPO PLANTATION RESORT	K1591 ^{PP} 2 NIGHTS TWIN SHARE KOKOPO BEACH BUNGALOW	K1552 ^{PP} 2 NIGHTS TWIN SHARE GAZELLE INTERNATIONAL
--	---	---

Inclusions: • Return airfares Port Moresby to Rabaul
• Accommodation as specified • Return airport and mask festival transfers
• Daily festival passes • All taxes and surcharges

Air Niugini
www.airniugini.com.pg

40 YEARS

Call toll free on **180 2121**
or email: tours@airniugini.com.pg
for more information

Ano Pala inap senisim toktok bilong K71.8 milien peimen

Yakam Kelo i raitim

MINISTA bilong Jastis na Atoni Jenerel Ano Pala inap senisim toktok bilong em olsem K71.8 milien peimen bilong Paraka Loya i no stret bihainim Lo.

Wanpela sinia opisa i bin tokim *Wantok* olsem minista Pala i luksave gen olsem dispela peimen bilong Paul Paraka Loya em i no stret. Dispela inap senisim ol toktok em mekim pastaim olsem peimen ya em stret bihainim Lo.

Insait ripot i tok Minista Ano Pala i laik stretim dispela toktok gen long rausim bikpela toksave na nius em mekim pinis long Tunde dispela wik olsem nogat hevi o asua long gavman bilong O’Niell long peim dispela mani go long Paraka Loyas.

Dispela toktok bilong Paraka peimen i kamapim bikpela tok-

tok na kot pinis we praim minister Peter O’Neill i gat nem long bekim ol askim bilong polis.

Bihain long Minista Ano Pala i kisim opis, em putim aut bikpela toksave olsem nogat asua nau. Rekot em klia olsem Paraka Loya bin holim ol kot bilong gavman long 2012 i kam na peimen bilong em i stret.

Tasol insait ripot ya i tok dispela toktok i no nupela. Olpela Minista bilong Jastis na Atoni Jenerel na memba bilong Rabaul Dokta Allan Marat bin lukim na tokaut tu egensim dispela peimen bipo. Memba bilong Sinasina Yongomugl, Kerenge Kua tu bin kamap Minista bilong jastis na Atoni Jenerel na i luksave long dispela asua tu. Long dispela as em go wantaim ripot bilong Tas Fos Swip Tim na sain pepa bilong olpela Polis Komisina Tom Kulunga long sasim praim min-

ister Peter O’Neill.

Opis bilong Minista Ano Pala i no mekim opisel toksave kam aut long dispela senis bilong toktok long aste apinun taim *Wantok* i go aut long prin.

Memba bilong Kandep na olpela minista bilong Fainens na Treseri Don Polye i tokaut long aste tu olsem toktok bilong minista Ano Pala olsem dispela peimen i stret bihainim Lo i no stret bikos i gat asua long en. Olsem na minister Pala i no ken pulim toktok go aut nabaut long abrusim wok bilong polis long karimaut Lo na Kot Oda.

Em tok mipela olgeta i redi long go long polis na bekim ol kwesten bilong polis long dispela peimen bilong Paraka Loyas o go long Kot long kliaim nem bilong ol. Olsem na praim minister Peter O’Neill mas mekim isi olsem na go kliaim nem bilong em tu bihainim Lo.

Menesmen bilong O’Neill i no gutpela long kantri: Polye

Stanley Nondol i raitim

MEMBA bilong Kandep na lida bilong T.H.E Pati Don Polye, i tok Praim Minista Peter O’Neill i no menesim gut iekonomik developmen na politikel demokresi long kantri.

Mista Polye i tok planti ol bikpela tok-pait i kamap long taim bilong O’Neill olsem i praim minista i no gutpela long ol pipel bilong kantri.

Em i tok gavman i no ran stret long groim ikonomi bilong kantri wantaim bikpela lukluk long opim rot bilong bisnis long ol manmeri long stretim laip bilong ol, na daunim turangu pasin long komyniti.

Mista Polye i toktok long sampela bikpela disisen bilong O’Neill gavman we em i tok em bai mekim hat long kantri bai i gat gutpela bihain taim.

Mista Polye i tok UBS K3 bilien i kisim bikpela hevi i kam long ikonomi bilong kantri.

Em i tok em olsem tresera I no bin haitim samting na g tokaut olsem bikpela mani bilong PNG LNG bai go

stret long bekim dinau bilong UBS lon.

Em i tok em bin lukim dispela i no stret tasol Mista O’Neill i bin go het na sainim lon agrimen bilong UBS.

Mista Polye i tok narapela em hevi bilong Paul Paraka. Em i tok dispela hevi i lukim ol lida bilong kantri brukim planti lo na i wok long abrusim wok bilong jastis o tok tru i laik kamap aninit long bilong kantri.

Dispela pasin i kisim nem no gut i kam long kantri long ai bilong ol investa, dona na ol arapela ogenaísesen bilong ausait i stap long kantri.

Moa long em i tok praim minista i go holim wok bilong konstitusen na ol bikpela wok bilong independen institusen olsem Polis.

Em i tok Praim Minista i rausim Tas Fos Swip Tim husat bin mekim wok painim long bikpela pasin korapsen we bin i gat komplem olsem O’Neill yet insait long K71.8 milien pemen i go long Paraka loya.

Mista Polye i tok PNC pati bilong O’Neill i laik stap long pawa yet na i wok long baim ol memba bilong ol arapela pati em wanpela bilong ol pasin O’Neill gavman i mekim i no gutpela long kolisin gavman.

Em i tok ol dispela hevi kantri i gat em olgeta pipel i save pinis husat tru i stap insait long pawa bilong gavman na yusim pawa long tanim i go kam long stap long pawa yet.

Tasol wanpela taim tok tru bai kamap long ples klia na nogat ples bilong ol giman lain.

Long wankain taim, Mista Polye i singaut long Ekting Polis komisina Geofrey Vaki, long mekim wok bilong em stret aninit long lo bilong kantri.

Em i tok wok painim bilong Paraka keis i go long bikpela levul pinis. Em i tok Mista Vaki i mas rispektim opis bilong polis komisina na bihainim disisen bilong kot i kamap pinis long distrik na nesenel kot.

Stanley Nondol i raitim

KOT i rausim tupela aplikesen bilong ekting polis komisina Geofrey Vaki long em i traim long stopim polis long arestim Praim Minista Peter O’Neill.

Mista Vaki I putim aplikesen long distrik kot long rausim arest waren bilong Mista O’Neill na em i putim narapela aplikesen long Nesenel kot long em i laik kisim investigesen fail bilong polis long em i laik lukluk gen long ol ripot polis i mekim pinis I.

Distrik kot long las wik i rausim

aplikesen bilong Mista Vaki long em i askim kot long rausim arest waret bilong praim Minista O’Neill.

Sif Mejistret Nerrie Eliakim husat I harim kot i tok polis i gat pawa long mekim arest aninit long lo na kot bai no inap rausim arest warent.

Em i tok sapos dispela kot i rausim arest warent, em bai soim olsem kot i bagarapim wok bilong polis. Em i tok polis i mekim wok bilong ol aninit long konstitusen na em i rausim aplikesen bilong Mista Vaki.

Mejistret Eliakim i tok tu olsem

kot bai no inap larim Mista Vaki long kisim fail long frod skwad na lukluk gen bikos bipo komisina Toami Kulunga i lukim pinis na i gat keis na i kisim arest warent long Mista O’Neill long kot.

Em i tok arest warent i kam long kot aninit long lo long pipelbai bihainim na i no gat as long kot bai rausim gen.

Wankain taim long las wik, Nesenel kot jas Jastis Ambeng Kandakasi i givim wanpela oda long Mista Vaki long noken kisim ol fail long ol polis.

Ol dispela kamap bihain long Nesenl Kot Jas kariko i rausim ap-

likesen bilong Mista O’Neill long givim oda long stopim polis long arestim em.

Jas Kariko i tok edministresen pawa bilong polis i stap wantaim polis komisina. Em i tok Mista Vaki I ken arestim O’Neill o nogat em stap wantaim em tu.

Bihain long kot i rausim tupela aplikesen bilong Mista Vaki, Mista O’Neill i witro o kisim bek apil bilong em long Suprim kot.

Mista O’Neill i tok em i rausim apil long larim polis komisina i mekim wok bilong em. Na sapos Mista Vaki i askim em long intaviu bai em i go long ai bilong polis.

Vaki gat 2-pela rot: Kua

I kam long pes 1...

Mista Kua i mekim dispela toktok long mekim klia as bilong kot disisen bilong Jas Jastis Kariko long Waigani Nesenel kot bi-long Julai 1 2014.

Long Julai , Jas Kariko i rausim aplikesen bilong Praim Minista Peter O’Neill long stopim Polis long arestim em long long K71.8 milien keis bilong Paul Paraka.

Jastis Kariko i go het na i tok polis komisian i gat kontrol long wok bilongPolis Fos aninit long seksen 198 bilong konstitusen o mama lo.

Mista Kua i tok em i mekim dispela toktok long tanim mining bilong Jas Kariko klia long ol pipel bikos planti pipel i ting olsem Nesenel Kot i givim ful pawa long Ekting Komisina Vaki long mekim disisen long laik bilong em long arest waren bilong O’Neill.

Bihain long Nesenel Kot i mekim disisen, Praim

Minista O’Neill i tok em i rispektim disisen bilong kot na i tok larim polis komisina i mekim wok bilong em.

Na moa long en taim Distrik Kot i rausim aplikesen bilong Mista Vaki long rausim arest waren long distrik kot, Mista O’Neill i rausim apil bilong em long Suprim Kot long salensim disisen bilong Jas Kariko. Na em i tok ekting polis komisina bai lukluk gen long ol fain na mekim wok bilong enl.

O’Neill i tok em i stap long han bilong Ekting Komisina Vaki long lukluk long ol fail, na sapos em askim em long go long intaviu bai em i go long ai bilong polis.

Tasol distrik kot i stopim ol frod skwad long no ken givim polis fail long Mista Vaki. Distrik kot i tok pastaim Komisina Toami Kulunga i blesim ol investigesen ripot pinis na kot i givim arest warent. Na

i no gat nid long Mista Vaki i lukluk gen.

“Edministresen na kontrol bilong Polis Fos i stap wantaim Polis Komisina aninit long konstisusen. Edministresen samting em i stap long komisina long stretim na i no kot”.“Na Mista Vaki bai go het na larim polis i arestim O’Neill na Marape tu i stap long han bilong em long mekim disisen”. “Mista Vaki i no nidim tok orait bilong kot long mekim ol wok bilong em.” Jastis Kariko i tok long disisen bilong em.

Mista Kua i tok Mista O’Neill na Ekting Komisina Vaki i yusim dispela hap toktok bilong Jas Kariko long strongim sait bilong wok bilong Mista Vaki na i go kam long kot.

Mista Kua i tok disisen bilong Nesenel Kot i no givim pawa long Mista Vaki long rausim arest waren bikos kot yet i givim arest warent na em i kam aninit long Warent Ekt.

Sanap strong wantaim lida bilong gavman...



O’Neill gat sapot yet...

Planti bilong ol Minista na Memba bilong Palamen i stap strong yet wantaim Praim Minista Peter O’Neill. Maski planti toktok i wok long kamap tasol ol dispela Minista na Memba i holim O’Neill long sait bilong ol.

Poto: Nicky Bernard

Noken maus nabaut — Eluh i tok

...toktok stap pinis long Kot

Yakam Kelo i raitim

OL Lida na politiks lain I no ken yusim nius long tromoi kainkain toktok long wok bilong polis long karim aut Kot Oda bilong holim na sasim Praim Minista Peter O'Neill, Thomas Eluh i tok.

Mista Eluh i tok Kot Oda i stap ples klia pinis na ol kainkain toktok olsem ol polisman husat i laik karim aut wok bilong ol i rong o bikhet o raskol polis lain i no stret olgeta.

Em tok polis bai putim was gut tru long olgeta toktok we i wok long kamap long nius. Na sapos wanpela toktok i abrus liklik egensim wok bilong polisman bai ol i dispela i go long kot bikos toktok ya i stap pinis long han bilong Kot.

Mista Eluh i mekim dispela toktok bihain long Minista bilong Hausing Paul Esikiel, i kolim ol raskol (rogue) polis lain husat bin karim aut Kot Oda bilong traim sasim praim minista. Wankain tu nupela minista bilong Jastis na Atoni Jenerel Ano Pala tu bin tokaut olsem dispela peimen (K71.8) bilong Paul Paraka Loyas em stret na i no brukim Lo.

Em i tok ol i no laik long painimpraim minista long dispela kain wei bikos em bikipela sem long yumi olgeta olsem na em i mas kam isi tasol long opis bai ol polisman i ken tok-tok wantaim em.

Thomas Eluh em Ekting Polis Komisina tasol em wantaim ol investigesen opisa bilong em i no holim wok moa bikos nupela Komisina Mista Vaki i rausim ol i go stap ausait (saspen) long wok.

Em i tok nau yet em i pilim bikipela sori long praim minista bikos ol loya na saveman i no givim gutpela tok stia long praim minista.

Olgeta pepa em olupela Polis Komisina Tom Kulunga i lukim pinis na mekim eksen we ol polisman i laik karimaut nau. Olsem na nupela Polis Komisina Geoffery Vaki i mas isi tasol singautim praim minsta long kam long opis na tok-tok wantaim ol polis opisa, Mista Eluh i tok.

Mista Eluh i tok Mista Vaki em i wanpela long taim polsiman na save gut long wok bilong polis olsem na em i mas mekim samting stret bihainim Lo na no ken mekim nabaut we kantri bai tingim nogut long em long planti yia bihain.

Polis laik strongim boda patrol

OL polisman bai mekim bikipela wok nau long sekim gut ol boda bilong Papua Niugini aninit long nupela Polis Komisina Geoffery Vaki. Dispela em toktok bilong Ekting Deputi Polis Komisina na Sief ov Operesens Jim Andrews long dispela wik.

Mista Andrews i tok planti hevi olsem ol ovasis lain save hait na karim ol kago na ol samting kam insait long kantri bikos i nogat gutpela wok sekyuriti o patrol na was long ol boda hap. Wanpela as nogat gutpela sekap em bikos ol polisman i save sot long sapot na wokman.

Em tok PNG mas mekim wok strong long boda bikos planti hait na stil pasin i kamap pinis long boda eria olsem ol ron-awe lain hait na kam olsem, hait na stilim ol pis long solwara bilong PNG na ol ausait kago i kam hait olsem na stap long strit na stua long PNG.

Em tok long las yia gavman bin salim ol polisman i go long Westen provins long putim was long solwara boda na eria long hap tasol nogat wanpela wok i kamap long dispela inap nau. Wanpela bikipela hevi em ol gavman opis na ejensi i no bin wok bung wantaim, em i tok.

Mista Andrews i tok aninit long lidasip bilong nupela Polis Komisina Geoffery Vaki, ol bai opim gen strong na wok bilong polis long ol boda provins na tu stretim gen wok bung wantaim ol lain gavman ejensi husat i gat wok long kain hevi na ol samting olsem long boda bilong PNG. Ol ejensi olsem Kastoms, ami na arapela moa.

Em tok kantri nau i lukim planti bikipela senis long sait bilong developmen olsem LNG na arapela bikipela ekonomik senis olsem na em i bikipela samting long gavman wantaim ol lo opis bilong em long strongim gut dispela eria bilong nesenel sekyuriti na interes bilong kantri.



POLIS HOS LONG FESTIVAL: Ol polis i raun long hos long putim was insait long Melanesian Ats Festival graun. Festival bai pinis long tumora. *Poto: Nicky Bernard*

GET MORE FOR LESS!

KUNDU PACKAGE ACCOUNT

Individual transaction fees are waived for all

- ✓ EFTPoS purchase
- ✓ ATM transactions
- ✓ Mobile Banking*
- ✓ Internet Banking
- ✓ First 6 Branch transactions FREE

*Standard service fees apply to purchase of EasiPAY and phone Top Ups.

K9.50

ONE STANDARD MONTHLY FEE

FOR MORE INFORMATION

320 1212 / 7030 1212 - 24/7

servicebsp@bsp.com.pg

www.bsp.com.pg



UNI nogat klas tupela de

PLANTI bilong ol sumatin long Yunivesiti bilong Papua Niugini long Pot Mosbi i no go insait long klasrum bilong ol long Tunde na Trinde bihain long bikpela pait i kirap namel long ol yet.

Dispela birua i kamap long Tunde san taim bihain long ol sumatin bin bung long autim tingting bilong ol long kamap stopim skul na wokabaut long soim bel kros bilong ol long hevi bilong kot bilong Praim Minista.

Wantok Niuspepa i no kisim tok kla long pait i kamap olsem wanem na husat ol grup sumatin i kirapim pait.

Bilong wanem i bin gat strongpela sekyuriti was long dispela taim.

Tasol insait long Yunivesiti nau i gat tupela grup bilong ol Hailens sumatin i stap long hap sait bilong skul banis.

Planti bilong ol sumatin tu husat save slip long skul i no kisim gutpela slip long Tunde nait long

wanem narapela grup i putim was long ples bilong slip.

Ol bik manmeri bilong skul nau i wok hat long bringim bel kol long ol sumatin long statim bek skul bilong dispela yia. Nau yet polis i putim was long banis bilong Yunivesiti.

4-pela MP i memba bilong T.H.E pati yet

MEMBA bilong Kandep na lida bilong T.H.E Pati, Don Pomb Ploye, i raitim pas i go long Rijistra bilong Politikal Pati, Dokta Alphonse Gelu olsem ol 4-pela memba bilong pati husat i tok ol i lusim pati i stap yet olsem memba bilong pati bilong em.

Mista Polye i tok long pas bilong em olsem Rejistra bilong Politikal Pati i no bihainim ol pasin bilong wok insait long ol bilong T.H.E Pati long em, na i larim ol dispela memba i go long bung wantaim narapela politikal pati.

Ol dispela mema em David Arore, Memba bilong Ijivitari, Delilah Gore, Memba bilong Sohe na Minista bilong Haia Edukesen, Memba bilong Kiriwina -Goode-nough na Minista bilong Fores, Douglas Tomurlesa, na Memba bilong Mendi, De Kewanu.



Don Polye, Memba bilong Kandep na lida bilong T.H.E pati. (Wantok file poto)

Mista Polye i tok T.H.E Pati konstitusen i tok, sapos wanpela memba i laik lusim pati em bai givim risain pas bilong em i go long ol eksekutiv bilong pati long skelim pastaim long ol i tok orait

long em i go.

Em i tok tu olsem Mista Kewanu tasol i bin mekim dispela, tasol Mista Polye wantaim ol narapela pati eksekutiv i lukim olsem em i brukim wanpela wanbel tok tok bilong pati we ol i bin mekim long Mas 2014 we em i tok, i no gat memba bilong T.H.E Pati bai lusim pati bikos long ol hevi nau i stap long politik.

"Mi lukim pasin bilong ol dispela 4-pela memba olsem ol i no lusim dispela pati wantaim gutpela pasin olsem na mi ting stap bilong ol wantaim nupela pati i no trupela," Mista Polye i tok.

Em i tok ol i stap yet olsem memba bilong T.H.E pati.

"Mi gat bikpela bilip long lidasip bilong ol na mi laik strongim ol long ol i mas lukluk moa long mekim wok bilong ol long helpim ol ilektoret bilong ol," em i tok.

Namah tok PM mas rispek long lo

LIDA bilong Oposisen na Memba bilong Vanimo Grin, Belden Norman Namah i tokaut olsem ol lain husat i stopim straik long Yunivesiti bilong Papua Niugini i no stret.

Mista Namah i tok tingting bilong stopim ol klas long Tunde i bin kamap long wanpela referendum ol sumatin i bin wokim long dispela wik na ol i bin tok olsem straik bai kamap.

"Moa namba bilong ol sumatin i tok orait long holim straik, na bilong wanem yumi no inap long rispekim demokrasi?" Mista Namah i tok.

"Sapos Praim Minista O'Neill i kisim moa vot bilong em long Palamen long stap olsem Praim Minista na yumi gat rispek long dispela, em i olsem yumi givim rispek long demokrasi," Mista Namah i tok.

Em i tok, ol yunivesiti i bin kisim vot long balot pepa long painimaut bai ol i straik



Belden Norman Namah, Oposisen Lida na Memba bilong Vanimo Grin.

o nogat. Iilektoret Komisen i bin go pas long dispela vot. Bikpela namba i bin tok ol bai holim wanpela straik i no gat trabel long stopim klas tasol.

"Nau praim minista i mas karim hevi bilong wanem samting i kamap long uunivesiti nau.

Ol sumatin i kisim vot long tokaut long tingting bilong ol bihainim pasin bilong demokrasi, na yumi mas rispekim dispela lo," Mista Namah i tok.

Oposisen lida i singaut long Nesenel Eksekutiv Kaunsil na Praim Minista, Peter O'Neill, long rispekim ol oda bilong kot olsem ol i bringim Tas Fos Swip Tim i kam bek gen.

"Larim Sam Koim olsem Siaman bilong Tas Fos Swip Tim na ol lain bilong em long mekim wok bilong ol.

Peter O'Neill na mi yet kamapim dispela tas fos olsem na em no inap long putim hevi long wanpela man.

Wok bilong Sam Koim na lain bilong em i namba wan olsem na sapos ol i tok yu gat sas orait yu mas mekim stret pasin," Mista Namah i tok.

Mista Namah i tok, stretpela pasin em long Mista O'Neill i mas go long polis long ol bai intaviu bilong em.

"Yu wankain tasol olsem olgeta Papua Niugini. Yumi olgeta i stap aninit long lo bilong dispela kantri long wankain mak tasol, maski praim minista o oposisen lida o wanpela pikinini long rot," Mista Namah i tok.



Polis pres opisa, Inspekta David Terry i toktok wantaim Suprintenden N'Dranou na ol arapela polis man harim i stap autsait long kot haus long Waigani we kot bilong ol polis yet i kamap. Poto: Nicky Bernard

WANTOK

NIUSPEPA BILONG YUMI OL PAPUA NIUGINI STRET

ADVERTISING SPECIAL PROMOTION!!!

TO ALL OUR VALUED CLIENTS! WANTOK PAPER IS OFFERING YOU A SPECIAL DEAL FOR JULY!!

For Payment of Five Quarter page full colour advert size, a Free same size/colour will be offered.

Offer valid for month of July 2014 only. Place your orders now to take advantage of these **SUPER DEAL!**

Contact our advertising sales team on Ph: 325 2500 Fax: 325 2579 or Email: advertising@wantok.com.pg

Ripot tok no gat bagarap long Basamuk eria

Ol pipel na ol samting long Basamuk na ol nambis eria long Madang i no gat pret moa bihain long ol saveman i testim olsem solwara long hap i no gat posin o bagarap long en.

Dispela toktok i kamap bihain long wanpela bikipela wok painimaut na tes ol kolim dip si teiling plesment (DSTP) i soim klia long ol toktok bilong maining kampani, Ramu NiCo, olsem ol samting i orait tasol long bus graun na wara long hap.

Dispela ripot i kamap bihain long lan Hargreaves and Associate (IHA) Scientists Pty Ltd long Australia husat em Dipatmen bilong Enviromen na Konsevesen (DEC) long PNG i bin makim ol long karimaut dispela wok painimaut.

Ol i bin kamapim dispela ripot long Jun 9, 2014 we ol givim go long PNG Gavman long opis bilong DEC, Mineral Risos Atoriti na Madang Provinsel Gavman long Jun 10, 2014.



Ol wokman lusim masin bilong sekim ol samting go daun long solwara.

DSTP em bikipela toktok na hevi we i bin kamap long Kot namel long ol Basamuk papagraun na Ramu NiCo projek. Dispela ripot bi-

long IHA inap stopim olgeta komplemen na toktok nau.

Olgeta wok painimaut ya i bin kamap tripela taim long tripela

level. Wanpela long mun Mas go long Epril, narapela long Oktoba go long Novemba na namba tri long Novemba i go long Disemba long yia 2013.

Dispela painimaut i gat 8-pela hap bilong em long luksave long DSTP long wanwan kona olsem sekim ol korol na rif, ol pis na abus, stadim hot o kol bilong solwara, sekim ol wesana aninit long solwara na planti arapela bikipela samting long aninit na antap bilong solwara. Ol dispela sekim bilong ol samting long solwara bin kamap

long Basamuk, Saidor go long Alk-sisafen na Rivo long Madang provins.

Dispela wok painimaut i soim olsem no gat wanpela samting i narakain long 2007 inap 2013 taim ol karimaut tes gen.

Ol graun na wesana arere long nambis tu ol i bin sekim i no soim wanpela sain bilong retipela graun malumalu we toktok bin kamap long en.

Ripot bilong ol i tok olgeta samting long solwara bai stap nomol tasol we i nogat birua o bagarap long ol abus na ol samting long hap o klostu tu long maining hap. Ol wara tu em ol i testim olsem no gat bagarap long ol kemikel long maining.

Menesmen bilong Ramu NiCo (MCC) i tok amamas long dispela ripot na tok klia olsem ol bai wok klostu olgeta taim long lukim olsem no gat bagarap bai kamap long ol samting long wara, solwara na graun long hap.

Julai 4 em i USA indipendens De!

JULAI 4, 2014 em i bikipela de bilong Yunaitet Stets bilong Amerika (USA).Em i namba 238 indipendens de bilong ol.

U.S Embesi i bin singautim ol nius lain wantaim ol bikipela manmeri bilong gavman, bisnis, sios na praivet sekta long wanpela kibung ol i holim long Gateway Hotel long Fonde 3 Julai long selebretim dispela bikipela de.

USA i bin kamap indipendens na lusim Gret Briten long Julai 4, 1776. Na long U.S ol i save selebretim indipendens de wantaim ol paiauwok, pared, babakui, kanival, piknik, konset, besbol gem, famili bung na ol politikal toktok.

Bikipela tingting bilong U.S Embesi long dispela indipendens de em 'Surfin' USA Beach' o 'Swim long nambis bilong USA'. Olsem na insait long dispela hotel rum em ol woklain i putim planti piksa long solwara long Amerika na long Papua Niugini tu.

Foren Afeas Minista, Rimbink Pato i bin makim gavman bilong

Papua Niugini long stap insait long dispela selebresen. Em i bin apim glas wain long nem bilong Presiden bilong Amerika, Barack Obama na ol pipel bilong Amerika wantaim U.S Embeseda, Walter North.

U.S Embeseda long Papua Niugini, Solomon Ailan na Vanuatu, Walter North, i givim luksave long gavman bilong Papua Niugini long larim kampani bilong U.S, Exxon Mobil, long wok bung wantaim long kamapim LNG projek long kantri.

Em i tok, "Taim yumi lukim wanem samting i wok long kamap long politik bilong PNG nau, em i givim mipela moa tingting long pasin bilong stap fri. Mipela i bin pait long kisim indipendens long amamas wantaim fridom. Mipela oltaim i mas was long lukautim dispela fridom," Mista North i tok.

Long dispela taim ol wokman meri bilong U.S Embesi i tanim tripela konprens rum bilong Gateway Hotel i kamap olsem wanpela



Piksa bilong wanpela olupela su i slip long nambis bilong Ela Bis long Pot Mosbi. Andrew Molen i kisim dispela poto na em i kisim namba tu awod long Solwara poto resis bilong U.S Embesi long Jun.

liklik kona bilong Amerika. Ol i putim ol kain laipstail bilong Amerika na mekim i luk olsem ples bilong ol.

Ol kaikai na dring tu ol i givim long ol lain i kamap em bilong Amerika yet.

Tripela poto bilong solwara we ol poto lain bilong Papua Niugini i salim i go long Fesbuk Poto resis bilong U.S Embesi i bin hangamap tu long dispela kona. Wanpela bilong ol dispela poto em bilong Andrew Molen, wanpela niusman bilong Spot Federeesen long PNG.

Long stori bilong poto bilong em, Andrew i tok, "Solwara i ken givim planti samting long ol kain kain lain. Tasol long mi, solwara em i laip."

"Laip i stap long solwara, olsem Andrew Molen i tok. Saiens i strongim dispela tok bilong em tu. Sapos yumi laik stap gut, yumi mas mekim gutpela pasin bilong helpim yumi na ol pikinini bilong yumi," Mista North i tok.

"Long dispela nait, yumi kam long bihainim singaut bilong Seketeri Keri long senisim ol polisi na apim luksave bilong graun, bus na solwara long olgeta samting yumi mekim. Long mun Jun Sekreteri

Kerry i bin holim wanpela bikipela konprens long toktok long lukautim Solwara.

"Dispela konprens i lukim ol kantri i bungim \$1.8 bilien long kamapim ol nupela wok poroman long mekim wok bilong sastenebel fiseri, rausim posin long solwara na ol narapela strongpela kemikal i save kilim ol pis samting long solwara," Mista North i tok.

"Pasin bilong lukautim solwara em i stap long blut bilong mipela longpela taim. Klostu taim bai yumi singim nesenel antem bilong Amerika, 'Star Spangled Banner'. Tasol mi ting olsem narapela nupela antem, 'Amerika naispela ples' em i tok klia moa long laikim bilong mipela long ol wara bilong mipela.

Las lain bilong em i go olsem, "Amerika! Amerika! God kamp-saitim marimari bilong em antap long yu. Em i putim hat bilong gutpela pasin brata long yu. i kam long solwara na i go long solwara i sain moa!" Mista North i pinisim tok.

Naru helpim Sambio SDA sios

Bustin Anzu i raitim

OL Seven De Adventis long ples Sambio long Mumeng Lokal Level Gavman bilong Bulolo distrik, i bin kisim helpim long pinisim haus lotu bilong ol.

Gavana bilong Morobe, Kelly Naru, i go long ples Sambio na givim K50,000 bilong stretim haus lotu bilong ol.

Dispela mani bai stretim o pinisim haus lotu we ol i bin wokim long 2012 na i nogat mani long pinisim.

Namel long ol lain husat i bin kamap long witnesim dispelaseremoni em, Distrik Edministreta bilong Bulolo, Tae Guambalek, Mumeng Lokal Level Gavman Presiden na Provinsal Minista bilong Maining Okam Patong, Wod

16 Kaunsila Baleng Peter.

Dispela presentesen i bin kamap bihain long dispela 150 kongregesini bin rait igo long Kristen Sios Patnasip Program o CCPP (Christian Churches Partnership Program) long helpim ol long pinisim dispela haus lotu.

Taim em i givim dispela mani Gavana Naru i tok yu ken kisim dispela kain helpim long ol lida bilong ol long wanem, kain mani olsem i stap long stretim ol long ples.

"Long ol projek na ol narapela liklik gavman sevis, gavman i save givim mani i kam long ol lida bilong yupela. Distrik Sevis Impruvmen Program na Lokal Level Gavman Sevis Impruvmen Program fan em bilong dispela kain sevis.

"Na yupela inap kisim helpim long lokal level gavman, lokal

memba bilong palamen na gavana olsem mi yet," Mista Naru i tok.

Em i tok em i save kisim K45 milien long wanpela yia taim lokal memba i save kisim K10 milien na K500,000 bilong ol lokal level gavman presiden.

Na em i helpim na sapotim ol wok bilong ol lokal level gavman presiden wantaim K400,000 bilong em i go long ol wok bilong ol insait long provins. Ol narapela representativ bilong Tutumang tu i save kisim dispela se we em i putim long en.

"Olgeta 33 lokal level gavman presiden i kisim dispela mani we mi givim long en. Ol narapela representativ bilong komyuniti, ol meri, bisnis na sios i kisim K200,000 long mekim wok bilong ol.

"Na olgeta bungim wantaim na ol

lokal level gavman i kisim K14 long wan wan yia long Provinsal Sevis Impruvmen Program fan bilong Gavana. Dispela em mani bilong helpim ol manmeri long kisim gavman sevis na dispela bai lukim, wok bilong gavman bai kamap long haus bilong ol," Naru i tok.

Gavana tu i autim tingting bilong em olsem dispela ol kain mani i kam olsem, ol i noken kam na stap tasol long Lae. Em i tok dispela mani i mas go daun long ol lokal level gavman na ol wod kaunsila. Ol dispela lain bai luksave long hevi bilong ples na bai yusim mani gut.

Gavana Naru tu i tok gavman bilong em i lukluk long bisnis bilong God na dispela bai kamap olsem namba wan samting. Dispela em long strongim wok bilong God igo

bikipela moa yet na i ken stretim laip bilong ol manmeri.

Mumeng lokal level gavman presiden na Provinsal Minista bilong Maining, Okam Patong i tok amamas long gavana bilong provins i krungutim Sambio na givim bikipela helpim long pinisim haus lotu bilong ol.

Senia elda bilong sios Donald Sen i tok ol i amamas long gavana bilong provins Kelly Naru i go na stap wantaim ol na givim han long pinisim dispela haus lotu bilong ol.

Em i tok dispela haus lotu em ol i bin statim long 2012 tasol ol i nogat mani long pinisim, olsem na ol i bin askim Kristen Sios Patnasip Program long helpim ol long pinisim.

Ol yet i bin kamapim K20,000 long statim dispela haus lotu.

Dai kamap long festival taim

Yakam Kelo i raitim

MINISTA bilong Turisim, Ats na Kalsa Boka Kondra i tok stori tru i go long ol famili na festival lain husat bin kam long Solomon Ailans na Fiji long dai bilong tupela memba bilong ol long las wiken.

John Tahinao husat em Dairekta bilong Solomon Ailans Kalsarel Komisin na man i go pas long kisim ol Solomon Ailan kam long festival i dai long las wiken. Na tu, bikmeri bilong Fiji, Finau Mara husat i kam long soim ol tumbuna mat em save wokim. Em tu dai long Sande na bodi bi-

long em i stap nau long Funeral Home long Mosbi, wetim ol wok redi bilong kisim bodi i go bek long kantri bilong em.

Minista Kondra long makim Gavman bilong Papua Niugini i mekim bikipela tok sori tru i go long olgeta famili na ol wantok bilong yumi long Fiji na Solomon Ailan long dispela tupela dai bin kamap.

Minista Kondra i tok kam blong ol wantok long Melanesia long dispela festival hia long PNG i wanpela bikipela bung wantaim bilong famili. Na long lukim ol i go bek em bikipela wari stret long lusim ol famili bilong yumi i go bek olsem.

Kamap bilong ol i soim olsem yumi ol wanpela pipel husat i drip wan wan antap long solwara olsem wanpela ailan pipel. Na dispela bung wantaim em i bikipela samting tru we yumi holim han gen na kam bung wantaim na amamas, Mista Kondra i tok.

Mista Kondra i salim bikipela tok sori i go long famili na ol pipel bilong Solomon Ailans na Fiji long dai bilong tupela brata susa ya. “Bai mipela i wok klostu wantaim Hai Komisina bilong Solomon Ailan na Fiji long salim bodi bilong tupela go bek long famili bilong tupelo”, Minista i tok.

Minista kisim bodi bilong Solomon Ailan lida go bek

... bai kisim bodi bilong meri Fiji tu go bek

BODI bilong bikman bilong Solomon Ailans, John Tahinao i lusim Mosbi long Tunde dispela wik na go bek long asples na kantri bilong em. John Tahinao em Dairekta bilong Kalsa long Solomon Ailans.

Long soim pasin bel sori na laikim long ol pipel bilong Solomon Ailans, Minista bilong Turism, Ats na Kalsa long Papua Niugini Boka Kondra tu i kalap long balus na kisim bodi i go long ol pipel bilong em. Em i go wantaim Minista bilong Kalsa na Turism long Solomon Ailans Mista Samuel Manetoali

husat tu bin kam long PNG long stap insait long dispela namba 5 Melanesian Festival ov Ats na Kalsa.

Siaman bilong festival, Dokta Jacob Simet na Hai Komisina bilong Solomon Ailans long PNG William Haomae na ol gavman opisa bilong Foren Afeas na Imigresen i bin kamap long ples balus long soim rispek na sori taim bodi bilong John Tahinao i kalap long balus.

Minista Kondra bin kam bek long PNG long Trinde (aste) bihain long em givim bodi i go long ol lain bilong em.

Wankain tu, Minista Kondra bai kalap long balus long kisim bodi bilong Mis Finau Mara bilong Fiji i go long ol pipel na kantri bilong em taim festival i pinis long dispela wik.

Mis Mara em i wanpela memba bilong ol Fiji grup husat bin kam long festival we em i soim ol tumbuna pasin bilong ol long samapim ol mat. Em bin dai long Sande 6 Julai, 2014. Bodi bilong em i stap long Funerel Hom long Mosbi we em bai go bek wantaim olgeta Fiji manmeri bihain long festival i pinis long dispela wik Fraide.

Daffodil Kap Golf De i kamap gen



CEO bilong Kensa Faundesen PNG, Dadi Toka Jr i kisim K25,000 sek long Ruth Waram na Thoa Rigani bilong Oil Search Limited.

DAFFODIL Kap Golf De bai kamap long Ogas 22 long Pot Mosbi, na long las wik Oil Search Limited i givim K25,000 i go long Kensa Faundesen PNG long tokaut long dispela.

Dispela Kap Golf De pilai salens em wanpela resis we ol bikipela bisnis haus bai salens long pilai golf bilong kamapim mani bilong wok marimari insait long komuniti. Dispela kain pilai resis i stap 11 yia nau, na Oil Search i save go pas long en.

Eksekyutiv Jeneral Menesa bilong Ekstenal Afea na Sastenabiliti bilong Oil Search na Siaman bilong Kensa Faundesen PNG, Gereia Aopi i bin tok aut long dispela golf salens long las wik.

“Oil Search Limited i save sponsa long Pot Mosbi Daffodil Kap Golf De olgeta yia. Na long dispela yia mani ol i kamapim long dispela pilai resis bai go long helpim Kensa Faundesen PNG na olgeta lain em i laik helpim,” Misat Aopi i tok.

Mista Aopi i askim ol narapela bisnis haus na ol sapota long kam bung wantaim Oil Search na kamapim mani bilong

helpim Kensa Faundesen PNG long mekim wok bilong en long skulim na tokaut long ol man, meri na pikinini long ol sik kensa insait long kantri.

PNG Institut bilong Medikal Risets i makim olsem long 10-pela man, wanpela i save dai long sik kensa. Taso wantaim gutpela skul na tok save, ol lain i ken luksave hariap na kisim marasin na kilim binatang bilong kensa.

Sif Eksekyutiv Opisa bilong Kensa Faundesen, Dadi Toka Jr i tok edukesen na awenes em i as tru bilong stretim ol hevi i save kamap long sik kensa.

“Wanpela tok i tru em i olsem planti taim, kensa bilong maus i save kamap long ol lain i save dring planti bia, smuk tapak na kaikai buai tumas.

Oral Helt Sevis bilong Nesenel Dipatmen bilong Heilt i soim olsem long PNG bikipela wari i stap long maus kensa bikos long pasin bilong kaikai buai wantaim daka na kambang.

Sapos ol pipel i laik lukautim famili bilong ol long no ken kisim kensa long maus, ol i mas stop long kaikai buai,” Mista Tok i tok.

Longpela yam bilong Maprik

Isaac Liri i raitim

OLGETA hap insait long Papua Niugini, na tu long ol arapela Melanesia kantri, i gat sisen bilong yam.

Long kastom bilong ol Amblam pipel bilong Maprik long Is Sepik Provins, kastom bilong planim yam em i wanpela bikipela samting.

Taim Wantok Niuspela i tok-tok wantaim Cecilia Simon, wanpela meri Amblam, em i tok dispela kastom bilong planim yam em i strong yet long ples bilong ol, na ol i laik strongim yet dispela kastom bilong ol.

Cecilia i tok long hap bilong Sepik, dispela kastom bilong kamapim yam i stap long Maprik tasol.

“Long ples, mipela save kolim yam long wapi” em i tok.

Long kastom bilong ol Amblam, ol man i save go pas

long planim na kamautim yam. Cecilia i tok ol meri i no save mekim planti wok long dispela kastom bilong planim yam.

“Ol meri save redi long singsing na danis tasol, na dispela i save kamap taim ol man i lusim gaden na karim yam i kam bek long ples,” Cecilia i tok.

“Long taim bilong planim yam, ol man i save sanapim haus bilong ol yet na i go slip long gaden na lukautim yam,” Cecilia i tok.

Em i tok ol man husat i save go pas long planim yam i save bihainim planti arapela liklik kastom.

Em i tok ol man i save stap ol yet na ol i save tambu long ol i slip kirap wantaim ol meri bilong ol long taim ol i planim yam.

Em i tok sapos ol i slip kirap wantaim meri bilong ol long taim ol i planim yam, yam bi-

long ol i no inap long kamap gut.

Em i tok long taim bipo, ol i save kilim ol man husat i brukim kastom bilong planim yam.

“Sampela taim ol man husat i brukim dispela kastom i save pasim pik” em i tok.

Cecilia i tok tu olsem long dispela nupela taim we planti senis i wok long kamap long ples bilong ol, planti yangpela manmeri i wok long lus tingting long pasin kastom bilong kamapim yam.

Em i tok lida bilong ol i luksave pinis olsem dispela pasin kastom i wok long lus, na long dispela as, ol i toktok strong long kam long dispela namba faiv Melanesian Ats Festival.

Em i tok ol i lida bilong ol i kamapim ol liklik grup long ples long helpim ol yangpela long bihainim dispela pasin kastom.



Longpela yam bilong Maprik long namba faiv Melanesian Festival. Poto Nicky Bernard.

Simbu soim tumbuna kukim sol long festival

Eric Sinebare i raitim

SIMBU ol i save tok "em i maun-ten na ston i pulap", tasol pasin kastom na stail bilong Simbu i save winim lewa bilong ol planti manmeri.

Simbu Provinsal Kalsa na Tur-sim opisa, Justin Jimmy, i mekim dispela tok taim em i tokaut Simbu grup husat i go long Mele-nesia Festival bilong Ats I kamap nau long Mosbi.

Simbu i bin redi na bringim olgeta tim bilong Simbu i go na soim ol Simbu kalsa na sampela stail kalsa o pasin tumbuna long Mosbi we olgeta arapela kantri long Pasifik lain tu i kamap na stap long en long dispela taim.

Em i tok, planti taim, Simbu i gat dispela kalsa we i no save go aut na soim long kain bikpela bung, nau em i givim luksave long Simbu long stap insait long dispela bikpela festival.

Simbu i soim ol sampela tumbuna olsem, "Karim Lek" Kukim Marita' na tu ol Karamui bai wok- about long wanpela rop i go kam na tu bikpela singsing kundu Simbu bilas na danis kundu.

Insait long dispela so, wanpela bikpela so nau em, tumbuna sol.

Dispela tumbuna sol em no gat wanpela lain i save mekim, na tu, no save go aut na soim long ol manmeri long pablik long wanem rot na wei ol i save kukim sol na kamapim tumbuna sol.

Dispela tumbuna sol, em ol lain

Keri pipel long Warasu lain bilong Karamui Nomane distrik na ol lain Gunagi long Sinasina Yongomugl tasol i save kukim.

Em i tok tu olsem dispela so em wanpela so i kamap na bai opim ai bilong olgeta lain manmeri na pikinini we ol tumbuna i mekim tumbuna sol long wanem kain save ol i gat long kamapim sol na yu ken kaikai dispela sol.

Wankain taim, Simbu provinsal edminstre Joe Kunda Naur MBE, i amamas tru na i sapotim dispela kalsa festival.

Em i tok em i no liklik festival, em i bikpela tru long kantri, na Simbu i pulap long kastom na laipstail we inap long soim ol arapela lain i kam lukim.

Simbu gavman i sapotim ol lain husat I kam long Mosbi nae m I soim sapot wantaim mani na ol arapela sapot long ol i go long dispela so.

Em i tok, yu mi mas holim pas pasin kalsa na strongim insait long provins na strongim bilong ol pikinini i kam bihain bai ol i holim dispela kastom i go yet.

Lod meya bilong Kundiawa, Wapia Kuglame tu i tok, "Simbu i gat gutpela tumbuna kastom i stap, tasol planti i stap hait na nau bai i go aut.

"Na dispela em wanpela samting mipela i amamas tru long en. Na mipela bai stap sambai long festival long sapotim na lukautim tim Simbu.

Kaugere eben klinik kisim ilektrik bet

KAUGERE Eben Klinik bilong Foa Skwea Living Lait Helt Sevis long Mosbi Saut ilektoret i bin kirap no gut long kisim 35 ilektrik bet bilong putim long nupela haus sik bilong ol.

Senia Pasto bilong Living Lait FoaSkwea sios, Rodney Tomuriesa i tok, sampela pren bilong Memba bilong Mosbi Saut na Minista bilong 2015 Pasifik Gems, Justin Tkatchenko i bin givim em dispela gutpela donesen.

Ol dispela bet i kam long Koffs Haba Haus sik long Nu Silan olsem presen i go long nupela Kaugere Eben Klinik.

Minista Tkatchenko i bin stat long wok wantaim Foa Skwea sios long las yia long mekim apgret bilong olpela Kaugere klinik wantaim mani mak bi-

long K1 milien.

Long taim bilong kisim wanpela K25,000 sek mani long Ela Motors long dispela wik, Mista Tkatchenko i tok em i amamas long ol bisnis haus i stap long Mosbi Saut ilektoret i wok long helpim long stretim Kaugere na Kira Kira eben klinik. Dispela em mani i go long helpim sios long baim tupela dokta long wok olgeta taim long Kaugere na Kira Kira eben klinik long Mosbi Saut.

"Foa Skwea Helt Sevis i bin statim wok insait long wanpela haus kar. Em i liklik spes tasol ol helt woka bilong sios i save wok strong tru long helpim samting olsem 80 siklain.

Sampela taim ol i no save kisim pe inap planti mun tasol pasto bilong ol i save painim we bilong lukautim ol gut," Mista

Tkatchenko i tok.

Em i tok ol bai gat wanpela profesenol dentis o dokta bilong stretim tit tu i stap olgeta taim long haus sik.

"Taim mipela i opim dispela klinik, mipela i bilip olsem ol sik lain bai kapsait i kam na i no ol lain long Mosbi Saut tasol, ating ol narapela lain tu," Mista Tkatchenko i tok.

"Bihain bai ol dokta i ken tingting long mekim mama karim wod i go bikpela wantaim moa wokman meri. Dispela eben klinik i kamap wanpela namba wan haus sik stret," Mista Tkatchenko i tok.

"Insait long mun Februari, Steamships Propeti aninit long Pasifik Pams Propeti bilong Steamships Treding kampani i bin givim K200,000 bilong baim ol medikal ikwipmen," Mista Tkatchenko i tok.

Sinasina Yongomugl Distrik tokaut long 2014 baset

Eric Sinebare i raitim

MEMBA bilong Sinasina Yongomugl na olpela Minista bilong Jastis na Atoni Jeneral, Kerenga Kua i tokaut long 2014 wok developmen plen na baset bilong ilektoret bilong em. Mak bilong mani ol bai yusim long dispela yia em K7milien.

Join Distrik Baset Praioriti Komiti i bin bung na miting long Giu praimer skul insait long Dinga, Suai lokal level gavman long dispela wik.

Foa milien Kina i go long ol arapela projek na ol komyuniti sapot projek na ol infrastraksa wok insait long distrik.

Mani inap long mak bilong K3milien i go long ol dinau i stap long las yia 2013 long ol wanem kain

wok i kamap long distrik na stretim olgeta dinau nau bai pinis.

Insait long dispela baset, ol pipel bilong SSY bai i gat wanpela gutpela rot bilong ol yangpela manmeri husait i laik skul na i kamap pailot bilong balus, nau mani i redi long helipim, olsem K2000,000 long wan wan yia. Dispela i bilong luksave na strongim ol saveman na meri na pikinini long bihaintaim bilong ol.

Planti ol wok developmen na arapela infrastraksa wok i kamap gut na nau na bai skruim yet na bai i go yet long dispela yia wok plen mani we i soim na tok klia long wok.

Mista Kua, i tok, em i no amamas long sampela wok i no kamap hariap long taim, na tu, wok ripot

bilong 2013 i no kamap hariap.

Tasol em i go yet long tokaut na soim ol nupela baset bilong 2014 long ol wok mas go yet na i no ken larim ol wok i slip i stap na lukluk long nupela wok. Em i tok ol wok i mas go yet.

Em i tokaut long dispela bung olsem, em i makim na tok save long ol odita o lain bilong sekim moni plen na buk bilong distrik i ken sekim na skelim sapos olgeta mani i stret long wok o nogat.

Em i tok, ol odita lain bai sekim las yia mani i go we na mekim wanem wok bai sekim buk bilong distrik na, long dispela yia mani plen i mas go yet na mekim wok we i stap pinis long baset na tok orait bilong Join Distrik Baset

Praioriti Komiti i tok orait long en.

Mista Kua i tok, "Mi askim ten milien kina long Nesenel Plening Opis las yia 2013 baset, tasol i no kamap hariap long las yia, olsem dispela na yia mi askim nesenel plening dipatmen long givim mipela K30 milien long sapotim ol wok insait long distrik long 2015 baset mani plen bilong wok.

Mista Kua i amamas long ol pipel olsem, olgeta samting bilong distrik baset em mipela i mekim long ples klia na i no mekim o pasim tok hait we pipel i no save. Dispela i kamapim olgeta samting ples klia na olgeta manmeri mas luksave wanem mani na ples i go we na mekim wanem wok insait long wan wan ples.



Lukluk bilong nupela Kaugere eben helt klinik long fran. Em bai op bihain long tupela wik. Foto: Nicky Bernard

FARM TRACTORS



120hp

90hp

70hp

50hp

40hp

- Slashers
- Disc Ploughs
- Disc Harrows
- Post Hole Augers
- Trailers

*Photos for illustration purposes only

PORT MORESBY: 323 2658 | Digicel: 7215 0333 / 7217 9815
LAE: 472 6324 KOKOPO: 982 8748 | email: machinery@agmark.com.pg



Australia Dairek Eid Program

Aplikesen nau i redi

AUSTRALIA Hai Komisen long Pot Mosbi i tokaut pinis long grant aplikesen fom bilong ol Papua Niugini long ol i ken aplai long Australia Gavman i givim Dairek Eid Program.

"Dispela Dairek Eid Program em i go stret long ol pipel bilong sapotim ol liklik projek bilong ol komyuniti we ol yet i kirapim na ranim," Australia Hai Komisina long PNG, Deborah Stokes, i tok.

"Mi laikim ol projek bilong strongim wok bilong ol meri na ol pipel i gat disability wantaim ol yut long mekim wok bilong ikononomi na sosel laip insait long PNG," Mis Stokes i tok.

Ol wan wan manmeri, wantaim ogenaiesen na komyuniti grup husat i mekim wok bilong helpim ol narapela na i no bilong bisinis i ken aplai long dispela gren fan.

Ol sampela gutpela projek long ol yia i go pinis em; masin bilong samapim klos i go long ol meri long Manus bilong helpim ol long sanapim klos, salim na kisim mani, Laibreri



Ol meri Pihi Lorengau Meri Grup bilong Manus i kisim 2o masin bilong samap I kam long Australia Hai Komisina Deborah Stokes.

selp na ol buk i go long wanpela elementri skul long Wabag, Enga provins long strongim ol pikinini long kisim save taim ol i liklik yet, na wara tenk bilong praimer skul sumatin long bus bilong Wape-namanda, Enga Provins.

Ol lain i gat laik long dispela gran i ken ritim gut ol gaidlain long luksave sapos ol i ken aplai long kisim Dairek Eid Program gren. Ol gaidlain i stap long internet websait adres ;www.dfat.gov.au/direct_aid_program.

Ol i ken salim tu aplikesen i go long; Direct Aid Program Coordinator long email: Port-Moresby.dap@dfat.gov.au o salim long pos opis adres: Australian High Commission, Locked Mail Bag 129, Godwit Road, Waigani NCD.

Longpela taim bilong san givim hatwok long Karkar

James G. Kila i raitim

LONGPELA taim long strongpela san na nogat ren pundaun i wok long givim hatwok long planti pipel nau long Karkar Ailan long Sumkar distrik, Madang Provins.

Ol mama i save painim taim tru long wokabaut longpela hap long painim wara bilong karim i go bek long haus long kukim kaikai, wasim plet, sospen, wasim klos na waswas. Ol i save go olgeta long sait bilong ol maunten long painim wara.

Ol pipel long Karkar Ailan i wok long kisim hatpela traime stret bikos ren i no pundaun longpela taim i winim tupela mun. Strongpela san i mekim ol tenk na ol dram wara bilong ol pipel long ples i drai olgeta.

Wantok Niuspepa i bin bungim sampela lain manmeri bilong ples Komoria i taim ol i wok long painim wara.

Ol tisa long Kalik Praimeri Skul wantaim familli long Komoroa 2 i save wokabaut longpela rot tru long painim wara long yusim.

Gret 3 tisa long Kalik Praimeri Skul, Angela McClay i tok olgeta moning ol famili bilong ol tisa i save wokabaut longpela rot i go painim wara bilong waswas, wasim plet-sospen na dring. Ol i save go long ples ol i kolim Ulil we i stap longwe liklik long skul bilong ol. Ol save karim bikipela ol



Tisa meri long Kalik praimer skul Angela (raithan) wokabaut longpela rot na painim wara i wok long ran isi, isi kamdaun long ston long sait bilong maunten long Komoria viles.

plastik kontena na wokabaut go painim wara long ol liklik ston wara i kam daun long maunten.

Ol i save wokabaut samting olsem 30 minit i go long dispela ples long kisim wara na taim ol i pulimapim pinis, ol i save karim ol hevi kontena wara i go bek gen long skul.

Ol ples long Karkar we i stap klostu long maunten paia i gat ol bikipela wara i stap.

Ol dispela ples we i gat bikipela wara i stap long en em long Gamog, Boroman na tu sampela hap we riva i ran em long Rasi long nambis.

Ol lain i gat kar na ol lain i stap klostu long dispela hap i laki bikos wara i ran yet, tasol planti i wok long tingting planti yet sapos bikipela taim bilong san i go het yet em dispela wara i ken drai.

Wankain i bin kamap long yia 1997 we longpela taim bilong san i mekim planti ol baret wara na riva long ailan i drai olgeta.



Yut, Meri na Famili

Pastor Barbara Lunge

Sanap na pre long Papua Niugini

WANEM kain wok yu save mekim olsem wanpela pris o wasman bilong kantri bilong yu?

Yu save tingting na wari long ol kain kain sin na pasin no gut i wok long kam insait long kantri bilong yu o nogat? Yu save pilim ol pen bilong mama i laik karim pikinini olsem ol profet bilong bipo i save pilim o nogat?

God i singautim yu nau long baim ol sea insait long wok bilong sanap namel na beten. Yu mas givim taim long pre long kantri bilong yu na ol pipel. Yu ken karim bebi insait long spirit long God i kamapim wanpela nupela samting insait long spirit long senisim nesen na ol komyuniti bilong yu. Sapos yu krai long bel bilong yu stret na i go long God, em bai harim yu na bekim ol prea bilong yu long oraitim dispela graun.

"Mi bin traime long painim wanpela man inap long autim tok bilong mi na bringim ol manmeri i kam bek long mi. Tasol mi painim painim na nogat. "Ezekiel 22:30 na tu i gat tok i stap olsem... "na long dispela taim sapos yupela ol manmeri mi bin makim bilong mi yet, i tanim bel na sori long ol bikhet pasin bilong yupela, na yupela i kam klostu long mi na beten long mi, na lusim ol dispela pasin nogut yupela i bin mekim, orait mi stap long heven na bai mi harim beten bilong yupela na lusim ol sin bilong g yupela na mekim graun bilong yupela i kamap gutpela gen. Oltaim bai mi sambai na redi long harim ol beten yupela i mekim long dispela ples, haus bilong mi i stap long en. " 2 Stori 7:14-15.

Profet Ezekeiel i singaut long foapela kain grup long sanap na makim ol lain i wokim sin i stap na i no mekim wok bilong ol wantaim pret bilong God. Namba wan em ol profet, namba 2 em ol pris, namba 3 ol prins o lida, namba 4 em ol pipel husat i stap long graun. Ezekeiel 22:23-29. Tanim bel long sin pasin bilong yupela na gutpela taim bai kam long Bikipela.

God i singaut long yu mas lotu long em na laikim em olsem namba wan wok bilong yu, na namba tu long pre long King na ol pikinini man bilong kantri bilong yu.

Taim yu pre long ol narapela em yu kamap patna bilong Jisas taim em i sindaun long han sut bilong God na i wok long beten long yumi olgeta wan wan.

"Ol manmeri i bin lukim em olsem wanpela man nogut. Tasol em i bin givim laip bilong em yet na karim hevi bilong sin bilong planti manmeri. Na em i bin prea bilong helpim ol manmeri bilongmekim sin." isaiah 53:12.

..."Nau em i stap long han sut bilong God, na em i save askim God long helpim yumi, " Romans 8:34.

Hibru 7:25 "Olsem na oltaim em i nap tru long kisim bek ol manmeri i kam klostu long God long nem bilong em, long wanem em i stap laip oltaim, na em i save beten long God long helpim ol."

Long taim Jisas i stap long graun bel bilong em i bruk long ol pipel i stap rabis tru. "Taim Jisas i stap man long graun, em i save mekim prea na beten long God. Em i save, God inap long kisim bek em, na em i no mas i dai, olsem na em i beten strong long God, na em i singaut strong na i krai planti. Em i save daunim laik bilong em yet na i aninit long God, olsem na God i harim beten bilong em."

"Jisas i kamap klostu long Jerusalem, na em i lukim taun, na em i krai long em.... "Luk 19:41

"Tasol mi yet mi gat wok bilong beten oltaim long God i helpim yupela. Sapos mu lusim beten bai mi mekim sin long Bikipela. Na mi bai skulim yupela long gutpela na stretpela pasin na yupela i mas bihainim. 1 Samuel 12:23

Entri tes bilong evanjelis trening i kamap ...Lukim taim bilong sindaun long tes

AMRON Nesenel Evanjelis Trening senta (NETC) long Madang i redi long kisim ol nupela sumating husat i laik skol neks yia, 2015 long kamap ol evenjelis long Evanjelikal Luteran Sios long PNG (ELC-PNG).

Senta i laik toksave olsem ol entri tes bai kamap long dispela wik na wik bihain long 9-pela ELC-PNG distrik opis.

Senta i tok ol wan wan distrik i ken salim ol kendidet bilong ol long aplai long sindaun long dispela tes.

Ol i makim taim bilong sindaun long ol entri tes long olgeta distrik olsem 10 kilok, na olsem, no ken abrusim dispela taim.

Long 10 kilok moning long dispela wik Tunde Julai 8, 2014, ol kendidet long Hagen I bin sindaun long entri tes long Hagen ELC-PNG Distrik opis, na long

wankain taim tu, ol narapela bai sindaun long Lae sapel long Ampo ELC-PNG hetkota.

Long aste Trinde Julai 9, 2014, ol kendidet long Banz i bin sindaun long entri tes long ELC-Jiwaka Distrik opis na long wankain taim, ol kendidet long Karkar bai sindaun long Gaubin stesen.

Ol dispela long Madang bai sindaun long wankain taim long

ELC Madang Distrik opis.

Long tude, Fonde moning Julai 10, 2014, ol kendidet long Kundiawa i sindaun long ELC-Simbu Distrik opis long Kundiawa taim ol lain long Wau bai sindaun long ELC-Ridima Peris long Wau.

Long tumora Fraide moning Julai 10, ol kendidet long Goroka bai sindaun ELC-Distrik opis long Goroka taim ol lain long Gagidu bai sindaun long ELC-Bethlehem sios opis.

Sidni Selebretim Peter ToRot pestode Sampela Sen Joseph Boroko perisina selebret wantaim ol

GUTPELA selebresen stret i bin kamap long Sidni, Australia long tingim pestode bilong namba wan Katolik matir bilong PNG, Santu Peter ToRot.

Pestode bilong Santu Peter ToRot i save kamap long Julai 7 olgeta yia.

Sen Brigid Peris long Marrickville, Sidni i bin selebretim pestode long las Sande, Julai 6, 2014 wantaim stail.

Ol Pesonis Komyuniti i lukautim dispela peris, wankain olsem long Sen Joseph's Katolik Peris long Is Boroko, Mosbi.

Pater Jacob Kuman i peris pris long Sen Brigid Peris na em bin askim ol Katolik manmeri bilong PNG i long Boroko Peris long go bung wantaim ol brata susa bilong ol long Australia na selebretim bikde bilong namba wan santu bilong PNG.

Olsem na 58 perisina bilong Sen Joseph's Peris long Boroko i bin go na selebret wantaim ol lain long Sen Brigid, Marrickville long Sidni.

Planti long ol lain i bin go long Sen Joseph's Boroko Peris i bilong Is Nu Briten, Nu Ailan na ol narapela hap bilong PNG, wantaim ol sampela OLSH Sister.

PNG Konsal long Sidni, Stephen Singin na presiden bilong PNG Wantok Asosiesen i bin stap tu long dispela lotu selebresen.

Ol Pater i bin bung wantaim long peris pris, Pater Jacob Kuman long wokim lotu selebresen em long Pater Peter bilong Simbu na Pater Paul bilong Hagen, tasol ol i beis long Australia na Provinsal bilong ol Pesenis Kongrikesen, Pater Thomas McDonough na Pater John Pearce bilong Sen Brigid's.

Sios i bin pulap tru na PNG kwaia i bin klosut autim ruf bilong sios wantaim ol naispela singsing na nek na tu, ol tumbuna singsing na danis proseso.

Ol perisina bilong Sen Brigid i bin amamas tru long ol singsing, ol tumbuna singsing na danis na bilip we ol PNG visita i bin soim.

Bihain long lotu selebresen, ol bin gat bung kaikai na singsing long amamasim olgeta i bin stap long dispela selebresen.

Em bin wanpela bikipela selebresen long givim luksave long bikipela santu bilong PNG.



KAM INSAIT LONG HAUS LOTU PROSESIO: PNG Katolik i go pas long liteji long selebretim pestode bilong Santu Peter ToRot long Marrickville Peris, Sidni, Australia.



SELEBRET WANTAIM: Sampela ol pater i bin selebretim santu misa wantaim.



KISIM PIKSA TAIM: Ol PNG grup i kisim poto ausait long sios bihain long lotu. *Ol Poto: Pater Tomas McDonough*



Wok politik i bagarapim gutpela sindaun pinis

OL yia 2011 na 2012 i no gutpela yia long wok politik insait long kantri bilong yumi.

Yumi lukim olgeta liklik anis yumi putim ol long haus tambaran i kros pait long kisim namba, na ol i no tingim yumi ol pipel.

Long olgeta nius pepa, yumi lukim praim minista na olgeta kru boi bilong em i tok olsem gavman i bilong ol pipel.

Sapos dispela tok i tru, em i min olsem pawa em yumi pipel na yumi tasol i putim ol long kamap lida. Taim yumi givim ol pawa na putim ol long bikipela haus bung long Waigani ol i pulumapim bel bilong ol yet long pinisim kaikai bilong yumi na i kam bek na givim yumi kaikai. i no bilong ol i kros pait na pulumapim bel bilong ol yet long pinisim kaikai bilong yumi. Long dispela ol asua tasol yumi pipel i kisim bikipela taim tru long hangre.

Watpo na dispela kain pasin gridi na prait i save kamap long ol lida yumi save givim pawa na makim ol long kamap lida, na makim maus bilong yumi long haus palamen? Wanpela bikipela asua em, mani tasol. Mani em as long ol hevi, na i save paulim lida bilong yumi.

Taim ol lida bilong yumi i lukim MANI bilong pipel em nau, stil pasin i save kamap na wan sekon tasol, ol i kamap milienea.

No gat wanpela han wok i mekim tasol lukim, stil tasol na ol i kamap milienea.

Lukim gutpela piksa em, Judas Iskariot.

Em wanpela bilong disaipel Jisas i makim em long wok bung wantaim gutpela Lida man Jisas, na bai go aut na harim na lukautim ol pipel bilong God.

Tasol em popaia long dispela wok, long wanem, ol i bin makim em long lukautim paus mani bilong ol disaipel. Na tingting bilong em i paul long mani tasol na em i givim masta bilong em yet i go long ol birua lain.

Wankain olsem i save kamap long haus mani bilong yumi pipel long Waigani tu.

Bikipela malti bilien na trilien i save lus nat-ing long haus mani, long wan wan dipatmen i go insait long wanem poket bilong ol memba bilong yumi.

Maski NEC i makim ol spesel grup long painim aut mani i go olsem wanem na basetim milien na milien kina, tasol em i hat long painimaut asua i kamap we.

Long ol palamen memba, ol loya na ol bikman long wan wan dipatmen, em i save hat tru, tasol long yumi pipel husat i givim pawa long ol i kisim luksave ol i ol lida, sampela i mekim narakain na paulim mani.

Long dispela tasol, yumi pipel i no gat tras na bilip long wok bilong sampela memba bilong yumi.

Yumi traia na lukim rot we ol sios strakta i wok.

Yumi i gat het man long sios na aninit long lidasip bilong ol, i gat sios wokman na hetman i salim ol wokman i go na wok wantaim yumi pipel long wan wan ples.

Tru tumas, em ol gutpela wasman bilong yumi. Ol i stiaim yumi long gutpela rot na givim yumi ol gutpela kaikai.

Yumi save kisim ol gutpela wok developmen na sevis, na yumi luksave mak sios i kamapim long laip bilong yumi, bilong wanem, sios i luksave long ol nid bilong pipel.

Wankain olsem, sapos dispela pasin stil ol memba bilong yumi i lusim na kisim gutpela piksa long wok bilong sios, bai yumi lukim olsem yumi i stap wankain olsem Saina o Japan.

Plis lusim pasin stil na givim trupela kaikai long yumi.



Strongpela raunwin long Japan ol i kolim Taipun Neoguri long Okinawa i kisim wangepa man. *Poto: ABC*

Planti milien pipel bai vot long 2014 ileksen long Indonesia

OL pipel bilong Indonesian i redi long vot long makim nupela presiden.

Dispela bai mekim rot bilong namba wan heno-va bilong pawa long wangepa lida em ol pipel yet i makim i go long narapela.

Tupela kendidet em Prabowo Subianto na Joko Widodo i no soim olsem bai gat klia wina taim ol vota i go long makim vot bilong ol.

Ileksen bilong tude em i wangepa bikpela samting we 185 milian vota bai vot long 6,000 ol ailan bilong Indonesia.

Ol vota i putim hol long balot pepa long soim husat kendidet ol i laikim i win.

Nupela opinion poll i soim olsem i no gat wangepa long tupela kendidet Joko "Jokowi" Widodo na Prabowo Subianto i pulim bikpela laik bilong ol pipel i winim narapela.

Poll bilong 2,400 pipal em Indonesian Survey Institute i karim aut i soim olsem i gat 3.6 pesen i separetim tupela kendidet wantaim wangepa mak long samting olsem 2 pesen.

Mista Subianto, foma ami jeneral long taim bilong President Suharto i bungim ol strongpela toktok long brukim ol Human Rait lo na dispela i mekim Mista Widodo i kamap klostu long em long laik bilong pipel.

Ol Wes Papua i amamas long stap long Melanesian Arts Festival

OL Wes Papua pipel long Papua New Guinea i tok ol i amamas tru long stap insait long Melanesian Arts na Culture festival em i go het nau long PNG.

Fred Mambrasa, em wangepa lida belong Wes Papua komyuniti long PNG i tok

dispela em i nambawan taim we ol i joinim ol narapla Melanesian pipel bilong PNG, Solomon Islands, Fiji, Vanuatu na New Caledonia long dispa-festival.

Ol pipel bilong Torres Straits long Queensland i stap tu long despela festival.

Tasol Mista Mambrasa i tok ol i no bin amamas tumas long lukim sampela pipel bilong Indonesia i bin sanap makim ol Melanesian pipel bilong West Papua long stat bilong festival.

Mista Mambrasa i tok ol Wes Papua lida long PNG i amamas long ol i stap long Namba 5 Melanesian Festival ov Ats na Kalsa, na em i bikpela samting long soim at na kalsa bilong ol.

Sik misel long Madang provins i go bikpela

MADANG Provinsal Helt Dairekta, Marcus Kachau, i tokout olsem dispela sik misels long provins bilong em i wok long go bikpela

Mista Kachau i tok em i gat bikpela wari tu olsem

no gut dispela sik misels bai go bikpela moa long provins, na kalap i go long ol narapela provins i gat boda wantaim Madang, olsem Morobe na Sepik sapos ol pipel i no lukautim gut ol yet long taim ol i kisim dispela sik.

Em i tok pastaim, em ol pikinini tasol i save kisim dispela sik, we krismas bilong ol i klostu long 6 -pela mun i go inap long wangepa krismas, tasol nau, ol bipela man na meri tu i wok long kisim.

Mista Kachau i go het na toktok long ol pipel i mas go kisim helpim kwik long ol klinik, etpos na haus sik.

Wangepa dai long Taipun Neoguri long Japan

WANPELA man i dai na tupela ten (20) i bin kisim bagarap taim Taipunn Neoguri o strongpela raun win i bin kamap long Okinawa Ailan em ol ailan grup long saut Japan.

Wangepa haus i bruk na pondaun long strongpela win bilong Typhoon Neoguri long Naha long saut ailan bilong Okinawa.

Ol atoriti long Japan i bin putim aut ol imejensi tok lukaut long strongpela win i ran long mak bilong 250 kilomita long wan awa, na ol bikpela si bruk long 14 mita, taim taipun i bin muv i go antap long Okinawa.

Ol i bin rausim ol dispela tok lukaut long dispela wik.

Long namel bilong taipun, ol i bin toksave long 600,000 pipel long lusim ol nambis ples na ol stret-pela graun na go long ol seif ples. Long wankain taim, 70,000 haus i no bin gat pawa.

Ol bin kenselim ol ran bilnog balus na pasim ol skul long sevim laip na abrusim bagarap.

NHK Nesenel televisen i tok wangepa man i bin dai taim bikpela si bruk i bin hamarim na kapsaitim bot bilong em.

Eitpela pipel, planti long ol lapun i bin kisim bagarap long bodi bilong ol long ol liklik eksiden.

Jemani i winim Brazil 7-1 long World Cup semi-final long Belo Horizonte.

JEMANI i bin kamapim bikpela win egensim Brazil long Wol Kap semi-final soka pilai resis long Belo Horizonte, Brazil, taim em i bin kamapim wangepa strongpela pilai na win long skoa 7-1.

Thomas Mueller i bin opim skoa long 11 minit mak, bihain Miroclav Klose i bin setim wangepa nupela Wol Kap rekod wantaim namba 16 gol em i kikim long rekot bilong em i pilai. Em i kisim gol long namba 23 minit.

Toni Kross i bin mekim 3-0 long namba 24 minit na tu minit bihain Kross i kikim narapela long banisim host kantri long i no gat sans long skorim moa gol.

Sami Khedira i bin skorim namba 5 long pinisim wangepa gutpela haf taim pilai bilong Jemani pilai-ia.

Ol poto nius



TENKYU NA GUTBAI: Bosmeri bilong Edukesen Midia Senta, Hatsie Mirou i prisenim wangepa PNG bilum na putim long nek bilong JICA wokmeri, Masumi Ichihara husat i pinis wok long PNG na i go bek long Japan long dispela wik. Mis Ichihara i bin wok long tupela yia wantaim Edukesen Midia Senta na edukesen projek we JICA i sapotim em EQUI TV na i amamas long wok long PNG we em i lainim planti samting long kantri na pipel, na em i kisim i go bek long Japan.



MAN I STRONGIM TV LONG OL SENTREL PROVINS SKUL: Fes Asisten Seketeri bilong Karikalum na Stendets wantaim Nesenel Edukesen Dipatmen na pastaim Edukesen bos wantaim Sentrel Provinsel Gavman (CPG), Titus Romano Hatagen i toktok long taim CPG i givim ol TV, DVD na ol risos buk i go long sampela skul long Sentrel Provins. Mista Hatagen i bin strongim provins long go insait long EQUITV program long ol Sentrel Provins skul we nau i ran gut na helpim tru ol sumatin na tisa long skul na wok bilong ol.



BULA VINAKA: Niqa Tuvuki bilong Fiji Ats Kaunsel, Tulia Seduadua na Melino Bola em tripela meri Fiji i bin kam long Namba 5 Melanesian Arts Festival na ol i raun painim ol samting long karim i go bek long ples. Piksa i soim tripela meri i baim ol bikpela Sepik basket we wangepa mama Is Sepik i salim stap.

Ol Poto: Sandra Amuru

WANTOK KOMENTRI

Luksave long liklik pe bilong ol wokmanmeri

Potnait pe em i bikipela samting long laip bilong wokman. Yu wok long gavman o kampani, kontrak bilong wokman i tok klia long hamas mani yu bai kisim long potnait o mun o wanem taim i stap insait long kontrak.

Lo bilong kantri i putim mak bilong mani bilong baim ol wokmanmeri. Dispela mak i no inap long go daunbilo long K2.29, bikos K2.29 wan aua em i minimam wej. Sapos wokman i kisim mani i stap daunbilo long dispela mak, em i ken kotim husat lain kisim em long wok.

Minimam wej i bin stap longpela taim tru long dispela mak K2.29, na i gat bikipela komplek i kamap long ol wokmanmeri bikos potnait pe i no inap long lukautim sindaun bilong ol.

Na sampela taim tu, kampani o bisnis ol i wok long en i no save baim gut ol wokman. Ol i yusim dispela mak bilong K2.29 tasol long kaunim hamas de ol i wok na baim ol.

Planti komplek long dispela kain pasin i kamap long ol lain i wok long ol stua o sekyuriti long ol liklik bisnis.

Papa bilong ol dispela bisnis i save olsem sapos ol i baim wokman aninit long K2.29 bai i gat kot olsem na ol i smat long baim mani inap long mak tasol.

Bikos long ol komplek, gavman i askim Minimam Wej Bot long raun long kantri na kisim tingting



bilong ol pipel na givim ripot i go bek long gavman.

Dispela Bot i putim ripot bilong

en pinis. Ol i askim gavman long apim mak bilong minimam wej i go antap long K3.20. Ripot i stap pinis

na wetim tok orait bilong gavman.

Ol lain i mekim wok leba na arapela wokmanmeri bai amamas long harim dispela nius. Prais bilong olgeta samting long stua na maket tu i go antap. Pe bilong balus na sip na ol arapela fi tu i sut i go antap.

Olsem na sapos ol i kisim liklik moa mani long potnait pe bilong ol, bai ol inap long lukautim gut famili. Em i gutpela nius tru bilong ol dispela wok lain, planti bilong ol i no winim bikipela skul na inap long mekim ol arapela wok we ol i ken kisim bikipela pe long potnait.

I gat planti gutpela samting bai kamap. Tasol i gat nogut bilong en tu. Sampela papa bilong ol kampani na bisnis bai yusim dispela nupela mak long katim daun namba bilong ol wokman.

Bai ol i tok i no gat inap profit long baim planti wokman long nupela mak bilong K3.20. Ol kampani husat i gat bisnis long ol plantasin na faktori bai pairap moa yet. Bikos bisnis bilong ol i bringim mani i kam insait long kantri na ol

i mas kamapim profit tu.

I gat ol narapela lain husat i papa long ol bisnis olsem ol stua.

Ol dispela lain i gat nem long baim ol wokmanmeri long liklik pe tumas.

Planti bilong ol i kisim ol yangpela man na meri long wok. Planti bilong ol dispela yangpela manmeri i pinisim skul tasol long gret 10 na i no gat sans long painim narapela wok, o papamama i no gat mani long helpim ol long skruim save bilong ol long ol narapela skul. I luk olsem ol i no amamas tumas.

Sampela bilong ol i yusim ol ovasis wantok bilong ol yet long mekim wok bilong lukautim til na putim ol kaikai long ol self long stua na mekim ol arapela liklik wok we ol Papua Niugini woklain i save mekim bipo.

Wanem toktok gavman i mekim nau long sapotim dispela askim bilong Minimam Wejes Bot long apim pe i go antap long mak bilong K3.20, em i disisen bilong gavman long mekim.

Tasol ol liklik wokmanmeri bilong Papua Niugini husat i save tuhat long mekim wok leba long plantasin o i wok long tinpis faktori o i stretim ol rum bilong ol hotel o i rausim ol pipia, bai putim yau nau long harim sapos dispela nupela mak bilong K3.20 i kamap tru, na wanem taim ol i ken lukim senis long potnait pe bilong ol.

Yumi no ken lusim tingting olsem ol dispela lain tu i mekim wok bilong kamapim developmen long kantri bilong yumi.

Larim Kot yet mekim disisen

YUMI kisim planti stori pinis long Praim Minista bilong Papua Niugini, Peter O'Neill na ol kot we i kamap long em bikos polis i laik holim na sasim em long hevi bilong wanpela bikipela peimen bilong mani mak long K71.8 milien Gavman i bin peim i go long wanpela loya kampani ol kolim Paul Paraka Loyas insait long Papua Niugini long las yia.

Nesenel Kot i tokaut olsem Kot i no gat wanpela samting long stopim o givim oda long wok bilong polis bikos polis i gat wok bilong em aninit long Lo bilong Papua Niugini long karimaut.

Olsem na sapos polis i laik holim na sasim Praim Minista, ol ken go het bihainim kot oda ol kolim waren ov ares we i tok long holim na sasim Praim Minista.

Nupela Komisina bilong Polis, Geoffery Vaki i kamapim wanpela kot pepa na go long kot long traim stopim ol opisa bilong em yet long noken karimaut dispela oda long holim Praim Minista yet inap em kisim na lukim pastaim ol dispela fail pepa we i bin kamapim diispela



kot oda bilong waren ov ares. Dispela inap surukim taim moa long polis bai i no inap sasim Praim Minista.

Tasol Distrik Kot Mejistret i tokaut olsem Kot i no inap oraitim dispela pepa bilong Polis Komisina bikos dispela em wok bilong polis edministresen we ol kamapim pinis na laik karimaut.

Olsem na Polis Komisina i no gat rait long lukluk gen na glasim dispela fail pepa bikos opis bilong Polis Komisina i mekim dispela wok pinis.

Bihain ol loya bilong Praim Minista mekim apil i go long Suprim Kot, tasol Suprim Kot tasol Praim Minista i rausim dispela apil bilong em.

Em nau disisen bilong Nesenel Kot Jas, Jastis Kariko i sanap klia olsem polis i ken go het long wok bilong ol.

Yumi ken lukim olsem bos bilong polis na loya bilong

Praim Minista i traim ol rot bilong stopim polis long no ken sasim Praim Minista tasol Kot i rausim na olgeta piksa i sut i go bek long Polis Komisina Geoffery Vaki long karimaut Kot Oda bilong holim na sasim Mista O'Neill.

Nau nupela ripot i kamap olsem dispela peimen bilong K71.8 milien i go long Paraka Loya i nogat asua long en. Peimen i stret bihainim olgeta pepa wok na rot bilong em bikos Paraka Loya bin mekim planti loya wok bilong Gavman long 2012 i kam.

Dispela nupela ripot i kam long opis bilong Atoni Jenerel we nupela Minista, Ano Pala i tokaut long en long dispela wik.

Bai Gavman i yusim dispela ripot long kliaim na stopim waren ov ares pepa egensim Praim Minista o nogat?

Em samting bilong ol lo man long skelim we yumi ol liklik manmeri bai harim na kisim save bihain.

Bos bilong Tas Fos Swip Tim, Sam Koim i tokaut olsem opis bilong em bin sekim gut tru olgeta pepa na

fail bilong dispela peimen long wanpela yia olgeta na ol i gat inap luksave olsem i gat bikipela asua i stap.

Olsem na ol i kamapim ripot long polis ken karimaut wok bilong em kisim waren ov ares na sasim Praim Minista.

Nau tupela toktok i bam we Sam Koim tok asua i stap long peimen bilong K71.8 milien, tasol Jastis na Atoni Jenerel Minista, Ano Pala i tok opis bilong em i gat klia rekot olsem dispela peimen em i stret na no gat asua long en.

Bilong wanem na olpela Jastis Minista, Kerenge Kua i no laik tok olsem ol rekot i stret?

Sapos em bin tok olsem, ating bai yumi no inap lukim ol kainkain salens na nois nabaut long pablik na ol skul sumatin long yunivesiti.

Moabeta larim samting i go long Kot na Kot yet i tokaut sapos peimen ya em stret o nogat.

Dispela inap daunim olgeta kainkain tingting nogut (saspek) nabaut we i mekim pablik na ol sumatin mekim bikipela nois go kam nau.



Published Weekly, Thursday, for
Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia

Websait: www.wantokniuspepa.com

Pe bilong wanpela yia, 52 niuspepa

PNG

AUSTRALIA

ASIA PACIFIC na JAPAN

AMERICA na EUROPE

KZZ0.00

US\$110.00

US\$150.00

US\$210.00

General Manager
Elizabeth Konga

Editor
Veronica Hatutasi

Published at
Able Building
Complex,
Sec 58 Lot 02,
Waigani Drive.

Word Publishing Company Limited
is owned by the four major churches of
Papua New Guinea - Catholic 55%,
Lutheran 25%, Anglican 10%, United
Church 10%. The company reserves the
right to accept or reject any advertise-
ment or other material submitted for
publication which it deems contrary to
the public interest at its absolute dis-
cretion. The publisher's general term
acceptance are available at Word Pub-
lishing Company Ltd and are set out full
on the display advertising form.

Melanisen Festival ov Ats na Kalsa long poto

Dro wantaim wesan

Nicky Bernard i raitim

TUPELA sumatin bilong wanpela hai skul long Vanuatu i kam wantaim ol grup bilong ol bik man-meri long stap insait long namba 5 Melansian Festival bilong Ats na Kalsa.

Dispela tupela sumatin save dro o mekim disain long wesan tasol, tupela i no save hapim pinga bilong tupela taim tupela dro long wesan.

Thierry Roy na Tekome Robert i gat kainkain stail long mekim disan taim tupela i dro long wesan. Taim tupela dro long festival planti ol yangpela mangi na meri bin putim ai long pinga bilong tupela.

Dispela liklik haus bilong ol long so graun bin pulim planti ol

yangpela skul pikinini na man-meri husat i bin raun long hap.

Thierry na Tekome save skul long Laisi Lab skul long Vanuatu na skul bilong tupela save lainim ol dispela Ats.

Wanpela bikman husat i kisim tupela kam i tok, ats na kalsa em bikpela samting long ol long Vanuatu, em tok ol stat long kisim go insait long ol skul bilong ol long hap long strongim pasin tumbuna bilong ol yet.

Em tok tu olsem ol UNESCO i luksave nau long dispela na givim tok orait long ol long lainim ats na kalsa bilong ol long ol skul bilong ol. Taim ol sumatin i pinis skul ol bai gat save long kalsa na ats bilong ples bilong ol na dispela bai i no inap lus na bai stap oltaim.



Noken westim wara ... *Raunwara*

wok long go daun

Yakam Kelo i raitim

MOSBI siti bai kisim bikipela taim no gut long wara sapos bikipela san na drai taim long nau i stap longpela taim moa.

Olsem na wara kampani long siti bin putim bikipela toksave i go aut long pablik long ol manmeri i mas yusim gut wara, na no ken larim ol paip i op na wara i ron nating nating.

Mosbi siti i gat mak olsem 600,000 manmeri tude na i gat planti fektori na bisnis i save yusim wara long dring na waswas na ranim bisnis. Na dispela wara saplai ol manmeri na bisnis i yusim nau em i kam long wanpela hap tasol. Em antap long Sirinumu Dem long asples bilong ol Koiari pipel.

Yumi olgeta i save olsem wara em i laip na olgeta samting olsem bus, gras, diwai, olgeta binatang na enimol, pis na yumi ol manmeri stap laip bikos long wara tasol. Olsem na wara em i bikipela samting tru long laip bilong yumi.

Ol bisnis tu i no inap ron sapos i no gat wara. Kantri tu i no inap kamap sapos i nogat wara.

Insait long Mosbi siti, i gat klostu olsem 200 setelmen we planti tausen

manmeri i stap long en, na tu, moa long 10-pela asples bilong ol Papua o Motu

Koitabu we olgeta i save kisim dispela wara saplai i kam long Sirinumu Dem long Koiari.

Wara kampani long Mosbi em EDARANU i save pulim dispela wara long paip na skelim i go long olgeta setelmen na asples ya, wantaim tu olgeta haus na bisnis haus insait long Mosbi siti.

Long las wik, EDARANU i bin putim aut pablik toksave long olgeta manmeri na ol bisnis haus i mas tingting gut nau na yusim gut wara. Noken westim wara nabaut.

Ol tok sapos paip i bruk orait yumi mas stretim hariap na sapos em bikipela tumas orait yumi toksave hariap i go long ol.

Bikipela wara tru i save ron nating long ol setelmen na ol asples we no gat man o meri save tingim long pasim o stopim ol wara we i ran nating.

Ol i save yusim wara pinis na i no tingim long pasim tep gut. Ol i larim tep i op stap na bikipela wara i save ron nating i go daun long baret olsem maunten wara.

Pasin bilong westim wara em i bikipela samting bikos nau level bilong wara i wok long go daun isi isi long Sirinumu Dem.

Longpela taim nau san i sanap yet na ples drai i wok long stap yet. Dispela drai bai stap sampela taim yet we opis bilong Nesenel Weda Sevis i bin tokaut long las wik.

Yumi ken kisim save nau olsem wara saplai em i kam long wanpela hap tasol, em Sirinumu. Na sapos wara i sot nau, tru tumas bai yumi bungim bikipela bagarap long Mosbi siti. Yumi ken kisim tingting long taim i no gat wara, planti samting i save go no gut na bagarap. Sindaun tu i save bagarap na laip bai go hat stret.

Wara kampani i bin mekim toksave tu long ol bisnis haus long lukluk long sampela arapela rot we ol ken pulim wara i kam long mekim wok bilong ol. Wanpela rot em long lukluk long painim graun wara na pulim i kam long mekim wok na sevim wara we yumi ken yusim gut long dring na waswas.

Mosbi i gat planti graun wara i stap we

sampela kampani i save pulim long mekim wok bilong ol wantaim olsem long 7 Mail, Waigani, Sabama maunten, Kone, 8 Mail, Laloki na arapela moa graun wara.

Olsem na Gavmani ken kam insait nau long putim mani na yumi ken pulim ol dispela graun wara na redim ol long bikipela tenk na sambai stap long yumi ken yusim long taim no gut olsem.

Yumi save tu olsem wanwan taim ol asples long Koiari i save laik straik na mekim pret ol lida na pipel bilong Mosbi siti olsem ol bai pasim wara. Kain pret olsem bai kamap yet olsem na ol graun wara olsem yumi mas redim na stap.

I gat tupela bikipela wara tru i stap long Magi Haiwe em Braun Riva na Vanapa. Tupela bikipela wara ya i ron nating i go daun long solwara, na olsem gavman i mas kamapim sampela plen nau long yumi ken pulim dispela wara i go long wanpela bikipela tenk o dem na mekim redi long sapotim Laloki wara we i kam long Sirinumu Dem.

Tasol taim yumi wok long toktok long kain rot olsem yet, yumi olgeta pipel bilong Mosbi siti long taun, ol setelmen na ples i mas tingting gut nau na no ken westim wara nabaut.

No ken pulim wara nabaut long ol raba hos i go long yusim na larim em i ran nating nating i go tulait.

Sapos paip i bruk long haus bilong yu, yu mas hariap stretim bikos yumi no laikim wara bai sot long dispela taim nau we san na drai taim i stap yet.

Tingim, level bilong wara i go daun pinis na yumi harim na ritim pinis bikipela toksave i kam long maus bilong wara kampani long las wik long dispela. Olsem na yumi no ken westim wara long nau i go.



TORO



BIABIA



KANAGE



KROSWOD

Akros	kamap long ples	Teknoloji	27 Pawa lait taim swis i stap olsem
1 Bun bilong PNG	29 Spik	10 Begin	29 Salim mani long pos opis
4 Kokonas	30 Nu Ailan	12 Tabak	
8 Olpela Sief Jastis	31 Ples bilong helpim	13 Laip i pinis	
9 PMV	ol lain i gat sik bilong dring	16 Ailan long Milen Be	
11 Atun na malas em tupela	32 Helpim i go stret	17 Ples bilong re-jista	
12 Papua _____		ol bisnis	
13 Distrik Opisa	Daun	18 Dipatmen bilong wok didiman	
14 Royal Navy	2 Net	20 Bos bilong Haus Palamen	
15 Ami	3 Bilong holim dua	22 Kol boks	
19 Ples wok	4 Gavman opis long Hagen	23 Mani	
21 Namba nain mun	5 Bris long Morobe	24 Meri long Baibel	
25 Haus lotu	6 Skindai	26 Pilai samting bilong pikinini	
26 Dringim	7 Apropiet		
27 I orait			
28 Taim bilong			

SUDOKU

4	2	6	8	7	9	3	1	5
5	8	3	1	2	4	7	9	6
7	9	1	3	5	6	2	4	8
3	6	8	9	4	7	5	2	1
1	7	5	2	8	3	9	6	4
9	4	2	6	1	5	8	3	7
6	3	4	5	9	8	1	7	2
2	5	9	7	6	1	4	8	3
8	1	7	4	3	2	6	5	9

Ansa bilong las wik Sudoku # 51

1	3		6					
	8		4		7		2	
4	5		7	8		6		
9			5		2		8	
	4		1			9		
8			4		7		6	
	6			7	8		1	5
3		8		5			4	
				4		2	7	

Ansa bilong Sudoku # 52 neks isu

K	A	U	N	S	O	L	B	I	H	E	L	T	I
	I	S	I		P	E	S		N	A	R	K	E
M		S	I	L		I	N		I	S	I	K	E
A	T	O	M		A		S	K	I	T	R	A	I
K	A		T		K	I		T	R	A	I	M	S
E		H	I	V	A	I	D	S		U			G
T	A	I	S		W		K	O	L	I	M	B	E
S	K	U	L		D	I	W	A	I		A	L	I
P	L	E	S		J	A	S		A	M	A	P	O
I		N	I	L		B	L	U	T		D	S	A
A	S	U	A		A	T	E	K		P	A	T	O
T	I	S		F	I	U	L		D	A	B	O	L

Ansa bilong las wik kroswod, isu # 2078

1	2		3		4	5	6	7	
					8				
	9	10			11				
12								13	
14			15			16	17		
		18				19			20
21	22		23	24					
	25							26	
27			28				29		
30			31			32			

© ABS, 2014

EMTV Television Guide

6:00 PM G	EMTV NATIONAL NEWS	10:45 — Meet The Browns (rpt)	5:00 AM	JOYCE MEYER 1086-2	11:00 AM G	EMTV NEWS REPLAY	5:30 PM G	ULTIMATE GUINNESS WORLD
6:30 PM G	TOK PIKSA - EP#2014/30	12:40 — Finding a Family	5:30 AM G	NATIONAL EMTV NEWS REPLAY	followed by the Australia Network		6:00 PM G	EMTV NATIONAL NEWS
7:00 PM G	QRL INTRUST CUP — ROUND 19	14:00 — Igor (rpt)	6:30 AM G	TODAY			7:00 PM G	OUR PORT MORESBY EP#37
	SEAGULLS vs. PNG HUNTERS	3:30PM G	9:00 AM	MALOLO CLUB		TRINDE JULAI 9, 2014	7:30 PM G	2014 STATE OF ORIGIN GAME 3
9:00 PM G	60 MINUTES	HI 5 S11 EP#13/43	09:00	— Smart Little 1				QUEENSLAND vs. NSW
10:00 PM MAO	SUNDAY NIGHT MOVIE	MAGICAL TALES S3 EP#29/47	10:30	— Charlotte's Web (rpt)			10:30 PM G	TOK PIKSA Ep#29 Rpt.
11:30 PM G	HILLSONG Rpt.	PYRAMID S3 EP#8/68	12:15	— Something That Lord Made (rpt)			11:00 PM G	NEWS REPLAY
00:00 AM G	EMTV NEWS REPLAY	THE SHAK S4 — EP#31/66	14:15	— Shrek 1			followed by the Australia Network	
.....followed by the Australia Network		5:30 PM G	3:30 PM G	KIDS KONA	5:00 AM G	JOYCE MEYER - 1086 - 3		
		5:55 PM G		HI 5 S11 EP#14/43	5:30 AM G	EMTV NEWS REPLAY		
		6:00 PM G		MAGICAL TALES S3 EP#30/47	6:30 AM G	TODAY		
		7:00 PM G		PYRAMID S3 EP#09/68	9:00 AM	MALOLO CLUB		
				THE SHAK S4 — EP#32/66	09:00	— Stuart Little 2		
					10:30	— Denise The Menace		
					12:00	— Shrek 2		
					13:30	— Life of Pi		
					3:30PM G	KIDS KONA		
						HI 5 S11 EP#15/43		
						MAGICAL TALES S3 EP#31/47		
4:00 AM G	AUSTRALIA NETWORK		8:00 PM G	BUSINESS PNG YR.3 —				
5:00 AM G	JOYCE MEYER — 1086-1		8:30 PM G	THE VOICE KIDS — SEASON 1				
5:30 AM G	EMTV NEWS REPLAY		10:00 PM PG	MERLIN SEASON 3 — EP#11/13 -				
6:00 AM G	TODAY							
9:00 AM	MALOLO CLUB							
09:00 - Frozen								
		TUNDE JULAI 8, 2014						

Ol Progem na Kilok i ken senis oltaim...

Raun insait long Melanisen Festival of Ats ples long Waigani, Mosbi



BIKPELA TUMBUNA HAUS STRET: Bikpela tumbuna haus bilong ol Gogodala pipel long Balimo, Westen Provins i bikpela haus tru long festival graun i pulim planti lain tru i go lukluk insait long en. Hia yumi lukim ol pipel i go antap long leda long narapela sait, lukluk raun insait na kam aut long leda gen long narapela sait.



NU KALEDONIA: Planti man, meri na pikinini i amamas raun na lukim festival. Hia ol i raun lukim ol ats, kaving na kraf, ol klos na tisiot na ol arapela samting long tumbuna haus bilong ol Nukaledonia.



FESTIVAL FIVA: Insait long tupela wik nau, bikpela eria long Waigani, long hapsait bilong Nesenel Palamen na Nesenel Musium ol i holim Namba 5 Melanisen Festival ov Ats i save pulap tru long ol pipel i raun i go long lukim ol tumbuna na kalsa ektiviti we ol poroman kantri bilong yumi long Melanesia na PNG tu i putim kamap. Planti yangpela pipel, ol skul sumatin na ol liklik pikinini i no isi long penim pes bilong ol insait long festival ples, Waigani, olsem hap bilong amamas long raun lukim so. Piksa i soim wanpela man i penim pes bilong dispela yangpela meri i stap. Ol lain i penim pes i wokim liklik makmak long sevis bilong ol. **Ol Poto: Sandra Amuru**

Raun wantaim Kanage olgeta wik

'Earthquake Man'

KANAGE em bilong ples Motonau long Not Kos Rot long Madang. Em i raunraun na em i hangre nogut tru na em go long haus na nogat kaikai. Isi tasol Kanage i stilim pis bilong meri bilong em na laik stat long kaikai i stap na wanpela poro kam na kolim nem bilong em, em guria nogut tru na laik tok yu mekim na mi guria na em abrus na tok, "Yu make me and i earthquake ya." Poro harim na tok stil man wantaim rong tok pisin.

Freda Melchior
Motonau, Madang



Man o wara i toktok?

KANAGE i kisim wara go na em i harim olsem ol i wok long senisim presen na tok meri kris-mas na hepi niu yia na amamas ol yet na tok na sekan i go i kam long soim amamas bilong ol wantaim krismas na hariap tasol em tok mi mas go hariap long haus na gritim meri bilong mi tu. Taim em kamap long haus em holim meri

bilong em na tok, "Where is my christmas?" meri kirap nogut long harim dispela tok na em i bekim, "Yu kilia, long long man Man tru tru toktok o wara tok-tok"

Freda Melchior
Motonau, Madang

Ol skwat!
Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email:
jwilson@wantok.com.pg

MI gat wari na mi laikim helpim

Dia Laipain,
MI WANPELA gel i gat 17 krismas na mi save stap wantaim papamama, tupela brata na tupela susa long ples. Haus bilong mipela i stap em yet na i longwe long bikples bilong mipela. Mi pinisim Gret 10 tasol mi no skruim skul bilong mi bikos i nogat gutpela sapot long papamama bilong mi. Mi nambawan pikinini long famili na mi sapos long skruim skul na bihain, painim wok long sapotim famili bilong mi.

Tasol mi no nap wokim dispela bikos mi stap nating long ples nau. Papa i lukim olsem mi no wokim wanpela samting na em i kros na tok mi westim nating mani bilong em we em bin baim skul fi i go long Gret 10 level. Wanpela apinun, em bin kam bek long taun wantaim sampela kaikai bilong haus, tasol em i spak wantaim tu. Ol narapela brata na susa i no kam bek long haus yet bihain long skul na mama i stap yet long gaden tu. Em i lukim olsem nogat man long haus na em bin askim mi long go wantaim em long wara na wetim em i waswas.

Long wara hap, em i givim mi sampela ol kaikai em bin baim na taim mi wok long kaikai i stap, em i giaman waswas na rausim ol klos bilong em. Kwiktai em i kam long baksait bilong mi, pulim na daunim mi na wokim pasin nogut long mi.

Mi pret long tokim mama bilong mi na husat moa long dispela samting. Tasol em i wok long mekim nabaut yet long mi. Bai mi mekim wanem na em i ken lusim mi? Mi no save bai mi mekim wanem na mi laik kilim mi yet. Plis, helpim mi.

Daughter, Contemplating Suicide

Dia Pren

Tenkyu long yu i gat strong long rait i kam long mipela na tokim mipela long hevi yu bungim long ples.

Mipela i luksave watpo planti yangpela pipel i bungim dispela kain hevi ol famili memba yet bilong ol i givim. Mipela i bilip olsem dispela i kamap bikos i nogat komitmen na tras i stap insait long famili. Tu, ol i no givim ol wanwan famili memba ol wok long mekim insait long famili yet.

Pren, mipela i laik tok olsem long planti yia i go pinis, famili i bin wan-



pela strongpela yunit we laik pasin, lukautim na helpim wanpela narapela em i bikpela samting. Ol famili na pren i bin raun i go long haus bilong wanpela narapela bilong lukim olsem famili i stap gut long ol kain kain birua. Tasol long tude, dispela kain bilong helpim wanpela narapela i no stap moa na pipel i stap bilong ol yet. Mipela i bilip olsem taim ol man i stap wan ol yet na ol i nogat narapela long stap, toktok na sea wantaim, ol kain tingting na pasin nogut i save kamap long het na pasin bilong ol we i no stret long ai bilong God na man.

Pren, dispela kain pasin we wanpela famili memba i mangalim na wokim pasin nogut long narapela famili memba i no bin stap samting olsem 20 krismas i go pinis, tasol nau, em i wok long kamap planti. Mipela i bilip olsem wan wan man i ken traim long skelim laip bilong em na wokim senis long kamapim gut laip bilong ol yangpela pipel na ol lain bai i kam bihain.

Mipela i amamas long yu i strong long wokim samting long dispela samting nogut i kamap long yu. Mipela i luksave olsem em i no isi long toktok long dispela pasin nogut papa i famili na wanblut stret i wokim long yu. Dispela i bikpela asua tru na i brukim lo bilong yumi. Mipela i enkarijim yu long toktok long wanpela man o meri we yu trastim na kisim helpim kwiktai.

Pren, papa i wokim pasin nogut long yu na dispela bai mekim yu abrusim em nay u go klostu long mama bilong yu. i moabeta yu toktok long em long samting i kamp long yu.

Pren, yu mas tingim ol mama i save laikim ol pikinini bilong ol moa moa yet na mama bilong yu bai helpim yu sapos yu toktok long em long samting i kamap long yu. Sapos yu painim hat long toktok long mama, yu nap yusim wanpela brata o susa bilong yu long tokim em olsem yu laik toktok wantaim em. Mipela i luksave olsem dispela bai i no isi long tokaut long

samting i ka map long yu. Bihain yu tokim mama bilong yu, yu ken go lukim pasto o pater long helpim yu na mekim samting long putim ripot long samting i kamap long yu.

Sapos yu no inap yusim ol famili memba, yu ken yusim wanpela lain ausait long famili yu trastim o pilim olsem yu ken toktok long em. Long nau, i moabeta yu abrsim papa bilong yu na i no go klostu long en. Mipela i bilip olsem yu nogat tras o luksave moa long papa bilong yu. Em i bikpela sem tru long papa o narapela famili memba long wokim dispela kain pasin long narapela famili memba.

Yu gat rait long papamama i lukautim yu na em i wok bilong ol long givim yu edukesen na lainim yu long kamap wanpela gutpela sitisen o manmeri bilong dispela kantri. Ol pikinini i gat ol rait long stap, muv na gat ol samting we olgeta pikinini i mas gat long groap na stap gut.

Pren, sapos samting we papa bilong yu i wokim i kamap long ples klia, papa bilong yu i ken go long haus kalabus na dispela i ken givim tok lukaut long ol narapela papa long ol i noken mekim dispela kain pasin. Mipela i bilip olsem ol papa i bos long ol famili tasol sampela papa i no mekim wok bilong ol na ol i laik eking yangpela olsem ol pikinini bilong ol. Na dispela i sori na sem pasin long ol dispela papa.

Mipela i strongim yupela ol yangpela pipel olsem sapos yupela i lukim sampela samting i no wok long go gut namel long yu na papa o mama o ol narapela famili memba, yum as wokim samting kwik o toktok long wanpela lain husat yu trastim na dispela i ken sevim yu long birua pasin i ken kamap long yu.

Pren bilong yu

Laipain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori bilong yu i kamap long niuspepa.

Laipain

Chan i singaut long papagraun na gavman i wok bung long Lihir MOA

Stanley Nondol i raitim

MINISTA bilong Maining, Byron Chan, i singaut long Nu Ailan Provinsal Gavman na ol presiden bilong Nima-mar na Sentrel Nu Ailan Lokol Levol Gavman long wok bung long kamapim ri-vais Memoremend bilong Agrimenn (MOA) bilong Lihir maining.

Minista Chan i tok dispela wok bung em long lukim ri-vais Memorandam bilong Agrimen i pinis wantaim wan-bel bilong olgeta pati.

Minista Chan i mekim dis-pela toktok long miting bilong Provinsal Asembli long Kaven long las wik.

“Mi laikim Provinsal Gav-man na ol LLG olsem Nima-mar na Sentrel Nu Ailan i wok wantaim mi long pinisim rivais MOA. Sapos ol LLG, Provin-sal Gavman i no wok bung wantaim mi bai lukim ol pipel bai no inap kisim ol gutpela sevis i kam aninit long MOA”.

Mista Chan i tok.

“Nu Ailan provins i mas wok bung na dispela i olsem ol lida bilong ol LLG long Na-matanai i mas wok bung wanataim wanbel na ol i ken kamap wantaim gutpela rot long givim ol sevis bilong Lihir maining i go long ol pipel. Maski long pilai planti politiks na yumi wok bung” Minisat Chan i tok.

Em i tok Nu Ailain komyu-niti, em yet olsem minista bi-long maining,i mas wok wantaim gavana bilong Nu Ailan, Sir Julius Chan long ri-vais MOA bilong Lihir. Sim-beri na Natailus Maining.

Minista Chan i laikim ekuiti bilong maining i save go long ol infrastraksa benefit i kam long ol divelopa bilong Sol-wara 1 projek , Natuilus bai go antap. Em i tok dispela bai lukim olsem wanpela spe-sel keis olsem minista bilong maining.

Em i tok long ol divelopmen pekej o sevis bilong ol papa-

graun, em bai kisim i go long Praim Minista Peter O’Neill long kisim tok orait bilong em na kabinet.

Em I tok ol papgraun bilong maining long planti yia i no bin kisim ol gutpela sevis long maining long eria bilong ol.

Minista Chan i tok olgeta maining long kantri i insait long bai go long rivyu na ol MOA bai revais wantaim luk-luk long givim gutpela sevis bilong wok maining i go long ol papagraun.

Minista Chan i tok nesenel gavman i givim tok orait long K300 milien long Solwara 1 projek long go het long Nu Ailan Provins.

Em i tok moa olsem bikipela samting em long ol papagraun, LLG, provinsal na nesenel gavman long wok bung na kamap wantaim gut-pela rot long kantri na provins, wantaim papagraun bai kisim ol sevis bilong ol bikipela maining insait long kantri.



Minista Chan an Minista Ben Micah i mekim toktok long miting long Kaveing.

Chan laikim Barrick long Porgera MOA rivyu

Stanley Nondol i raitim

MINISTA bilong Maining, Byron Chan i tok divelopa bi-long malti bilien kina Porg-era main long Enga provins, em Barrick Gold Limited i mas kamap pati bilong Porg-era Moa rivyu.

Minista Chan i mekim dis-pela toktok bihain long Bar-rick Gold Limited i tok em bai no inap kamap pati bi-long MOA. Na dispela i no gutpela tumas wantaim ol papagraun.

“Mi laik lukim gutpela wok-bung i kamap namel long Barrick, ol papagraun, Enga Provinsal Gavman na ol stekolda bilong Porgera Main. Tasol bikipela lukluk em long ol papagaraun i mas kisim gutpela sevis long maining i kamap long graun bilong ol.”Mista Chan i tok.

Minista Chan long wan-pela miting long Pot Mosbi namel long ol papagraun, nesenel gavman , provinsal gavman na Barrick i tok olsem i moa gutpela long

gol main divelopa, Barrick i mas kamap pati bilong Porg-era MOA rivyu.

Disapela Rivyu i laik pinis..

“Mi laik lukim Barrick i stap insait long rivyu bilong Porg-era maining na em i no ken lukluk tasol bikos em di-velopa bilong maining. Dis-pela em i bikipela toktok na sanap bilong mi wantaim ol papagraun em long lukim Barrick i mas kamap pati bi-long Porgeta rivyu.” Mista Chan i tok.

Dispela MOA namel long lo papagraun, Enga Provin-sal gavman na Nesenel Gavman i lukluk long planti samting long maining. Sam-pela samting dispela rivyu i lukluk long en em long en-vironmen demes na risetel-men bilong ol papagraun bikos graun bilong ol em wok maining i kamap.

Minista Chan i tok Ne-senel Gavman i sanap strong long lukluk long planti hevi bilong ol papagraun long dispela MOA rivyu.



Minista bilong Maining Byron Chan long miting long Pot Mosbi.

Prais bilong Fiul i kam daun

INDEPENDEN Konsuma na Kompetisen Komisin (ICCC) i tokaut olsem prais bilong disil, petrol na kerosin bai kam daun long dispela mun.

ICCC i mekim dispela toksave bihain long em i kisim tok orait bilong bikipela fiul saplai long kantri, iN-TEROIL. Dispela em bihain long kamapani i skelim Impot Partily Price (IPP), na i tokaut long dispela.

Ektong Sif Eksektiv Opisa (ECO) bilong ICCC, Brian Ivosa i tok kalkulsen bilong intrOil bilong Julai long Disel, kerosin na petrol em i kam daun na i go long ol-geta sevis stesen long kantri.

Prais bilong petrol long Julai bai kam daun long K2.10 long wan wan lita. Long Jun em i stap long K2.50.

Prais bilong kerosin long Jun i stap long K2.50. Na long Julai bai kam daun long K2.08.

Prais bilong Disiel bai kam daun long K2.1 long Julai. Long Jun em i bin stap long K2.57.

Mista Ivosa i tok prais bi-long disil, petrol na kerosin i kam daun long dispela mun bikos veliu bilong kina i go antap long 20 pesen taim Benk bilong Papua Niugini

(BPGNG) i mekim wok bi-long em i go insait long ek-sens reit.

Bihain long lukluk long ol senis i kamap long wol na domestik maket na senis long eksens reit na long holssel prais na retell prais, prais bilong petrol, disil na kerosin bai kam daun long Julai 2014.

Bihainim ol dispela senis, ol riteil prais bilong ol fiul pamp bai senis i go daun.

-Prais bilong petrol i kam daun long 45 t long wanwan lita,

- Prais bilong disil i kam daun long 53t long wanwan lita,

- Prais bilong kerosin i kam daun long 46t long wanwan lita.

Mista ivosa i tok prais bi-long ol tri pela petroleum prodak i kam daun em i 11.9pesen long wan wan lita Em i tok ICCC i save putim prais bilong holssel na retel maket long wan wan yia. IPP prais em i kam aninit long InterOil Projek Agrimen.

ICCC tu i save lukautim rot na solwara freit reit long wanwan kwata we i kam aninit long fiul distribusen arensmen na lukim fiul reit i no ken go antap tumas. Na i givim hevi long ol kastoma long kantri.

PNG bai hostim namba tu MSG invesmen rotso na tred fe



Minista bilong Tred, Komes na Industri, Ricahrd Maru

Stanley Nondol i raitim

MINISTA bilong Tred Komes na Industri Richard Maru i tokaut olsem gavman bilong PNG bai hostim namba tu Melanosian Spearhead Group (MSG) Onvesmen Rotso na Tred Fe long Novemba 2-4, 2014 long Pot Mosbi.

Minista Maru i tok long Me 2013 long namba wan MSG Tred Minista Miting long Nadi, Fiji, ol arapela MSG memba kantri i tok orait long PNG bai hostim invesmen Rotso na Tred Fe long dispela yia.

"Ol MSG kantri i tok ol i

amamas long kisim ol ekspota na investa i kam inves long kantri". Minista Maru i tok.

Wanpela ki as tingting namel long ol arapela em long ol MSG I gat visen long narapela 25 yia we ol i laik lukluk long ikonimik kopresen na intagresen.

Minista Maru i tok wantaim ol bisnis i wok long gro long Pasifik na i gat bikipela sans long wok ikonimik i ken gro bikipela moa, na sapotim ol infrastraksa developmen long helpim ol pipel na ol i ken sapotim ol yet.

Em i tok long Novemba 5-6, 2014, ol hetman bilong In-

vesmen Promosen Atoriti bilong MSG kantri bai holim wanpela kibung long toktok long ol invesmen na bisnis namel long ol MSG memba kantri.

Minista Maru i tok wok namel long ol MSG kantri long strongim wok bisnis na invesmen i stap long mak wantaim bikipela lukluk bilong Esia Pasifik Ikonimik Kporesen (APEC). PNG em wanpela kantri tasol Pasifik Ailan kantri long i stap long APEC.

"PNG em i bikipela kantri long Pasifik long populesen, graun, na i gat planti neturel risos. Na i gat planti sans

long wok bisnis na ikonimik i wok long gro strong. Olsem na yumi mas go wokim bisnis long ol narapela kantri tu." Mista Maru i tok.

Minista Maru i tok wantaim ol dispela, em i amamas long tokaut olsem PNG bai hostim dispela bikipela kibung bilong bisnis na invesmen long Pot Mosbi.

Dispela kibung bai kisim bikipela namba bilong ol ekspota, ol kampani, ol oge-naisesen husat i laik wokim bisnis long PNG, ol ejensi bilong invesmen na promosen i kam insait long PNG i ken soim kala bilong ol na toktok long wok bisnis long kantri

bilong ol.

Dispela kibung tu bai kisim i kam ol gavman opisel bilong ol MSG kantri long Fiji, Solomon Ailan, Vanuatu, New Caledonia long ol bai promotim na soim ol prodak, na toktok long ol bisnis invesmen i stap long ol kantri bilong ol.

Minista Maru i tok nesenel komiti we Dipatmen bilong Tred, Komes na Industri i statim pinis ol wok redi long dispela kibung.

Dispela kibung i kamap tu long taim Ppalamen bai bung long tebolim 2015 baset bilong kantri na tu PNG Tred Fe.

Westpac Benk i luksave long wok bilong ol meri

Stanley Nondol i raitim

WESPAC Benk i mekim benking bisnis longpela taim tru long kantri, na gat bikipela luksave long wok ol meri mekim long developim kantri. Na long las wik em i takaut olsem nominesen i op long komyuniti na bisnis haus i ken makim ol meri long kisim bikipela luksave we Westpac bai givim kain kain prais long ol.

Westpac i statim dispela progrem long 2007 aninit long nem (*Westpac Women in Business*) o Westpac Meri long Bisnis tasol, nau nem i senis go long *Outstanding Womens Award* o Outstanding Meri Award long givim luksave long kain kain wok erai we ol meri mekim bikipela wok long helpim developmen bilong kantri.

I gat 5-pela awod grup; Praiswatahaus Praivet Sekta Sekta Awod, Steamship Pablik Sekta Awod, SP Breweri Entraprenua Awod, Trukai Komunutyi Awod na IBBM Yang Acheiva Awod.

Wina bilong wanwan grup bai kamap kendidet long stap long bikipela resis bilong winim taitol bilong Westpac Autstandin meri Awod bilong 2014. Na winim K5,000 edukesen gren.

Meri winim taitol bilong 2014 bai kisim tropi long luksave long gutpela wok. Antap long en em bai kisim wanpela trip long long Australia Eksektiv Womens Lidasip Miting neks yia.

Westpac Menesing Direkta, Geoff Toone i tok dispela awod em i mak bilong soim Westpac komitmen long kamapim jenda balens long PNG.

Mista Toone, i tok ol meri save mekim bikipela wok long developmen bilong kantri na wanwan de ol i mekim bikipela wok. Dispela kain progrem na awod i soim olsem i gat bikipela luksave na amamasim wok bilong ol meri.

Mista Toone i tok PNG i kamap bikipela pilaia long planti eria. I no long neterel risos tasol. Em i moa gutpela long givim luksave long ol wok ol meri i mekim na ptomotim ol long sanap strong long developmen bilong kantri.

Em i tok PNG i gat planti ol strongpela na hatwok meri long bisnis na long wok. Benk i luksave na i wok long sapotim na promotim long las 8-pela yia aninit long dispela program.

Mista Toone i tok, Westpac i kamapim nupela program long givim skul tok long ol meri, na tok wina bilong wan wan grup bai kisim bikipela skul na stia tok long 12-pela mun long strongim skills na save bilong ol long wanem wok ol i mekim i stap.

Nominesen fom stap long olgeta bres bilong Westpac benk long kantri na long websait. Westpac bai tokaut long ol wina bilong 2014 Westpac Outstanding Women Awod long Pot Mosbi long Gateway Hotel long Oktoba 15, 2014.

MEMBA bilong Vanimo Green na Oposisen Lida, Belden Namah i sainim Memorendam ov Andas-tending (MOU) wantaim Digicel Limited long mani mak bilong K2.5 milien. Dispela em long apim mak bilong mobail komyunikesen long Vanimo Green Distrik long Sandaun Provins.

Mista Namah i tok dispela saining bilong rolaut program bai lukim Join Distrik Plening na Baset Praioriti

Komiti i putim K2.5 milien long putim 5-pela tawa.

Wan wan tawa bai sanap long Bewani, Immonda, Green Riva na long Ist Kos long distrik long olgeta hap bilong distrk bai kisim signal bilong Digicel.

Mista Namah i tok komyunikesen em i wanpela bikipela divelpomen na i save helpim long mekim laip isi. Em i tok distrik edministresen bai wok klostu wantaim Digicel long rolim ol program i stap long MoU

long givim gutpela sevis long ol pipel long distrik bilong em.

Eking gavana bilong West Sepik, Paul Negai i tok em i makim maus bilong ol pipel bilong Wes Sepik na i tok amamas long Mista Namah na Digicel long sainim MoU long apim mobail komyunikesen netwok long provins.

Ol makim maus lain long Digicel i tok tenkyu long Mista Namah long sapot bilong em long ol wok na plen

Digicel i gat long rolim aut ol projek olsem sanapim tawa long apim komyunikesen netwok bilong Digicel.

Digicel PNG i tok taim dispela projek i pinis dispela bai lukim mobail Komyunikesen long Wes Sepik bai moa gutpela.

Digicel PNG i tok em i amamas long wok poroman wantaim ol lida long kantri long givim sevis long ol pipel i stap long ples long we long taun na distrik.



Oposisen lida, Belden Namah, i sainim MoU wantaim mausman bilong Digicel: *Poto na stori bilong Renata Laveli, oposisen Midia.*

CPL opim DIY hadwea haus long Pot Mosbi

NUPELA ‘Do it Yourself’ o ‘yu yet mekim’ stua bilong Hadwea Haus i op nau long Pot Mosbi.

Nem bilong dispela hadwea stua em Haus Depo, we yu ken sekim ol tul na baim bilong wokim haus, o wokim gaden.

Em i kos K7 milien na i karamapim 3,000 skwea mita bilong sels, na ol i lainim gut olgeta samting long mekim isi long painim ol tul bilong wokim haus samting.

“Samting em i narakain

wantaim dispela stua em i olsem mipela i givim kastoma nupela kain sevis bilong ‘holim na pilim’ ol samting olsem ol pen bilong haus o long baim ol hadwea samting long holisel,” David Foreman, Haus Depo Ritel Kompleks Menesa i tok.

“Ol kontrakta i gat save long wok bai save long yusim ol tul, tasol ol narapela lain husat i no save wokim haus bai i no save. Mipela i mas skulim ol long we bilong yusim ol dispela tul,” Mista Foreman i tok.

Long ol narapela kantri, long taim no gut na gutpela taim, ol lain i gat haus i save go long ol DIY ritel stua long lukim kain kain samting ol inap long baim na yusim long stretim haus bilong ol.

Dispela DIY o ‘yu yet mekim’ pasin bilong ranim stua em i no stap long PNG na ol pipel i save baim ol narapela lain long mekim wok long haus bilong ol. Dispela Haus Depo i laik senisim nau.

Senis namel long olupela hadwea stua stail na nupela

DIY stua em i olsem, DIY stua i givim moa luksave long skulim ol lain long we bilong yusim ol tul na tu long stretim taim ol i bagarap na long soim ol kastoma long wok bilong plaming. Ol woklain bai gvim trening long ol kastoma.

Dispela stua bai op long 8 kilok moning taim na i pas long 8 kilok long nait olgeta de long wik. CPL Grup na Vinod Patel Grup bilong Fiji i patna long kirapim dispela bisnis.



Insait long Haus Depo yu ken painim olgeta kain tul na samting bilong senisim haus na gaden bilong yu. Em isi tru long yu ken painim samting bikos ol i lainim gut. *Poto: Nicky Bernard*

Taiwan i gat luksave long bisnis sekta long PNG

TAIWAN i kamapim 2014 Taiwan Bisnis Delegates Asosiesen long PNG.

Man i makim Tred Minis bilong Ripablik bilong Saina (long Taiwan) long PNG, Daniel Chin-pu Hu i tokaut long dispela.

Mista Hu i tok man i go pas long delegates em Siaman bilong Taiwan Turnkey Projek Asosiesen, Chin-the Chang. Em bin kam long Mosbi las yia long Taiwan Tred Fe.

Delegates i bin raun i kam

long Mosbi long las wik.

Delegates i gat ol senia menesmen bilong 9-pela kampani na ol institusen i gat bikipela na gutpela luksave long Taiwan.

Em long Taiwan Ikonomi Teknoloji Kampani, Taiwan Faundes bilong Egrikalserele Strateji Koalisen, Tripel Tresas Grup, Taiwan Egrikalserele Ikonomi Teknoloji kampani, LCY Kemikal Kop, Hwa Tai Invesmen Kampani, Tang Eng Steel Kampani, Wan Uio

Human Risos Kampani na Taiwan Turnkey Asosiesen.

Long lukluk long Smol na Midium Ikonmik sekta (SME), na long promotim wok long kirapim ol fektori na wokim ol samting long ol neturel risos bilong PNG yet, PNG i ken mekim olsem Vietnam na Indonesia husat i traim hat long mekim bisnis long ol kantri bilong ol.

Indonesia i lonsim sampela program na tok oraitim sampela lo long pulim ol bisnis

kampani bilong Taiwan i go long long kantri we bai pulim samting olsem US\$20 bilien.

Mak long tred namel long Taiwan na PNG i go antap long US\$366.3 milien long las yia, skelim wantaim US\$268 milien long 2012.

Bailaterel tred namel long Taiwan na PNG bai gro long ol yia i kam, Mista Hu i tok.

Raun bilong ol bisnis lain bilong Taiwan i kam long PNG i soim luksave Taiwan i gat long bisni9s sekta long PNG.

PNG i ken mekim bisnis wantaim West Papua

Stanley Nondol i raitim

PAPUA Niugini i ken lukluk long ol bikipela sans i stap wantaim Wes Papua long ol bisnis na tred. Dispela sans i stap yet na wok bisnis na invesmen i ken helpim tupela

pren long kamapim moa wok.

Minista biong Tred Komes na Indastri Richard Maru i tok Wes Papua em ol pren bilong yumi na i save serim boda long graun. I gat planti ol sans long yumi ken mekim bisnis olsem egrikalsa, fore-

stri na ol narapela i stap yet.

Minista Maru i tok PNG bai holim bikipela kibung bilong Melanesia Spiahet Grup (MSG) long Tred Fe na Rot so na Wes Papua ol tu bai kam soim ol kainkain bisnis ol i gat.

Em i tok PNG i lukluk long kamapim strongpela wok poroman long bisnis wantaim West Papua bikos ol i gat planti risos na i gat bikipela sans long ol kantri long Pasifik i ken go inves long hap na mekim kainkaina bisnis.

Ol meri long Simbu i kisim fainensel inklusen skul

Stanley Nondol i raitim

MOA long 1,400 meri long Simbu provins i greduet long Maikro Fainens Ekspensen Projek (MEP) long kisim save long fainensel inklusen. Dispela program em i gutpela long ol meri o kisim save long fainens, na bai go het long mekim liklik wok bisnis na sapotim family bilong ol.

Long las wik 1,412 meri i greduet namel long 2,500 husat i kisim fainensel edukesen trening long Simbu provins na kisim setifiket.

Gavman bilong PNG, Sentral Benk, Aus Aid, na Esian Dvelopmen Benk (ADB) i sapotim ol pipel long Simbu aninit long Senta bilong Ek-selens na Fainensel Inklusen (CEFI) program.

Deputi Gavana bilong Sentral Benk na Siamna bilong MEP, Benny Popoitai i givim setifiket long 2,500 manmeri.

Ol memba bilong MEP Stiring Komiti, ol wokman bilong BPNG, ADB na ol ofisal bilong Australia gavman i witesim dispela bikipela namba i greduet.

Mista Popoitai i tok MEP i komited long sosel empawamen bilong ol meri long kantri long balensim jenda na givim moa sapot long ol meri long save long rot bilong benking, fainens na ol i ken wokim bisnis long sapotim family bilong ol.

Em i tok MEP i lukluk long givim trening long fainensel edukesen long ol pipel inap em i givim long 120,000 pipel long kantri long yia 2017.

Aninit long dispela program i gat 6-pela fainensel

edukesen prprogram bilong lainim, baseting, dinau menesmen, fainensel negosiesen, benk sevis, na mobail mani.

Ol 2,500 pipel long Simbu i pinisim tupela program seavings na baseting.

Mista Popoitai i tok fainensel litresi program bilong ol lain i kisim liklik pe o i no gat inap mani bai helpim ol yet long ol i ken lukautim liklik mani ol i gat wantaim ol save ol i kisim long baseting na sevim mani.

Mista Popoitai i tok MEP em i gutpela program BPNG wantaim helpim bilong ol arapela patna i statim long givim gutpela skul tok long ol manmeri long i gat save na bai lukautim mani bilong ol.

BPNG i lonsim dispela program aninit long CEFI long Epril 2012 wantaim helpim bilong ADB.

Aninit long dispela program Benk bai wok wantaim ol narapela fainensel institusen i stap pinis. Em long ol komesel benk, seavings na lon Sosaiti, Maiko fainens na ol arapela long givim skul tok long ol PNG manmeri long ol bai gat inap save long lukautim mani long liklik bisnis na inkam bilong ol.

Ambumangre Maikro Kredit Skim bilong Simbu provins em i wanpela bilong ol fainensel institusen i givim trening long moa long 10,000 manmeri bilong 6-pela distrik bilong Simbu pinis. 40 pesen bilong ol em ol meri. Na moa long 60 pesen bilong ol trena em ol meri i go pas na givim skul tok long ol manmeri.

Transpot kampani i no kisim pe long LNG

Stanley Nondol i raitim

OL transpot kampani husat i save wok aninit long PNG LNG projek i komplek olsem ol i no kisim kontrak mani bilong ol na dinau bilong ol wantaim LNG i go antap long sampela milien kina.

Ol transpot kampani komplek olsem ol i mekim wok pinis long taim bilong konstraksen na i no kisim mani long ranim bisnis bilong ol.

Memba bilong Huon Galp Ross Seymour i tok transpot kampani bilong em i bin wok wantaim LNG projek na i wetim pe long Rot Transpot Asosiesen.

“Mipela i yusim ol masin, kar menpawa na ol risos long helpim LNG projek long taim bilong konstraksen. Nau konstraksen i pinis na LNG salim ges i go aut pinis long wol maket. Tasol olsem wanem long ol mipela liklik kampani na pipel i sapotim LNG projek,” Mista Seymour i tok.

Em i tok planti transpot kamapni i wetim pe yet. Ol i wok aninit long Rot Transpot Asosiesen (RTA). Na RTA i save baim ol taim em i kisim pe bilong em long LNG.

Mista Seymour i tok ol bikipela kar na masin bilong ol i no inap long wok moa long kisim mani bikos ino gat mani long ranim.

Em i tok wan wan bikipela kar i kosim milien kina. Na sapos wanpela kampani i gat 10-pela bikipela kar, em K10 milien. Planti bilong ol kar i no ran. Bikipela milien bisnis I no ran bikos LNG i no baim ol.

Mista Seymour i tok planti taim ol i bin raitim pas long askim RTA long baim ol tasol RTA no inap long baim ol bikos em i no kisim pe yet long LNG.

Em i tok LNG projek i tok em bai baim tasol i wok long skruim taim yet.

Transpot kampani i lukluk long kisim LNG i go long kot.



Bes-lain Sevei bai kamap long helpim ol mama

WANPELA wok painimaut long kisim infomesen long givim helpim ol i kolim bes-lain sevi bai kamap long helpim ol mama o meri long kamapim wok bisnis insait long Ramu NiCo Projek Impekt eria.

Dispela bes-lain sevi bai stat long dispela mun Julai i go inap long mun Ogas.

Dispela sevi em ol i kolim long 'Sosio-ekonomik Bes-lain Sevei' blong ol meri insait long Ramu NiCo Projek impekt eria, na bai lukim wok bung bai kamap namel long PNG Semba ov Mains na Petroleum na Ramu NiCo Projek Komyuniti Afes Dipatmen.

Dispela sosio-ekonomik bes-lain sevi i bai kamap bihain long wanpela woksop long Mosbi we Ramu NiCo i bin stap long en tu we ol lain i glasim na skelim olsem planti ol wok projek insait long maining na petroleum eria long PNG namel long ol meri i go het gut bikos nogat gupela menesmen. Antap long en tu planti taim ol meri na ol mama i no save gat sans long kamapim ol projek. Ol man tasol i save laik go pas long planti samting.

Woksop i skelim tu olsem planti ol mani i kam long ovasis long sapotim wok bilong ol meri insait long las 20 yia i no karim gupela kaikai. Na planti taim laip bilong ol meri na ol famili insait long ol maining na petroleum projek eria i no kamap orait tumas.

As-tingting bilong dispela Ramu NiCo Projek sosio-ekonomik bes-lain sevi em long kisim infomesen long painimaut stret wanem nid o samting ol mama i nidim o i ken wokim long helpim sindaun bilong ol wantaim famili bilong ol insait long Ramu NiCo Projek eria.

Narapela samting tu em long helpim ol meri long save gut long yusim ol piksa o katun long karimaut bes-lain sevi. Antap long dispela em bai ol meri i ken lainim wok bihainim ol tul-kit we i gat piksa long en na mekim ol kwesten na tu mekim ol plen long karimaut wok.

Bihain long ol lain i mekim intaviu o askim na kisim ol bekim long wanem nid bilong ol meri ol bai kamapim ol projek na progrem wantaim helpim i kam long PNG Semba ov Mains na Petroleum, na mani blong dispela ol projek bai i kam long Japanese Sosel Developmen Fan (JSDF).

Insait long dispela sosio-ekonomik bes-lain sevi ol lain husat bai karimaut intaviu bai kisim training long rot bilong yusim ol tul-kit long wok-ples blong ol long karimaut ol konsaltesen o askim na bekim na bai yusim

wanem infomesen ol i kisim long plenim na mekim disain long ol wok i kamap.

Ramu NiCo Komyuniti Afes Agrikalsa supavaisa, Allan Wahwah i tok bikipela samting long dispela sevi we ol bai yusim tul-kit wantaim piksa long kisim infomesen long plenim wok na disainim ol projek na progrem we bai helpim ol meri insait long main projek eria.

Sampela ol bikipela askim insait long dispela bes-lain sevi we ol opisa bilong Komyuniti Afes Dipatmen bilong Ramu NiCo bai mekim i kamapim:

Wanem sampela ol empawamen o strong ol meri i gat long sait long kamapim ol liklik (smol) bisnis;

Wanem sampela ol liklik save ol meri i gat long sait long kamapim smol bisnis long sait long agrikalsa, laipstok (lukautim ol en-imol), redim kaikai, salim kolos, redim ol ples blong slip na malolo,

Wanem ol menesmen save o skils ol meri i nidim long kamapim stretpela o gupela wok insait long liklik bisnis ol i kirapim na menesim.

Wanem sampela bikipela samting we i save daunim o stopim ol meri long go insait long kamapim ol liklik bisnis long ples. Sevei bai skelim ol strong, wiknes na wanem ol wok i ken kamap na ol salens i stap (SWOC).

Wanem ol developmen plen ol i ken givim long kamapim ol samting long stretim sindaun blong ol meri long ples na hauslain insait long Ramu NiCo Projek eria.

Dispela sosio-ekonomik sevi bai kamapim ol viles long KBK olsem Enekuai, Dengekeveh, Kinimati, Modish, Daunagar na Banu. Ol viles long Inlen Paipain eria we sevi bai kamapim em Naru, Biribiri, Ono, Tapopo, Iguruwe, Usino mausrot, na long Kostal Paipain we sevi bai kamapim em Didiwala, Erima, Bom, Kaliku, Bongu na Lillah. Ol viles long Basamuk em Dein, Mindre, Jangak, Ganglau, Kulilau na Tugyak.

Insait long wok plen bilong dispela sosio-ekonomik bes-lain sevi bai lukim sevi i kamap long KBK eria long Julai 15 i go 18, long Inlen Paipain long Julai 22 i go 25, long Kostal Paipain long Ogas 4 i go 8 na long Basamuk long Ogas 18 i go 22.

Ol lain husat bai go pas long karimaut dispela sosio-ekonomik sevi em Allan Wahwah bilong Ramu NiCo wantaim Agatha Yombai wantaim ol CA fil opisa na tu bai lukim wanpela meri konsalten bilong PNG Semba ov Mains na Petroleum Lynnette Oportio i wok klostu wantaim ol.



Wanpela katun piksa ol lain opisa bilong Ramu NiCo na wokmeri bilong PNG Semba ov Mains na Petroleum bai yusim long kisim infomesen long sevi. Katun i soim spak papa save wok long main i kam lukim tupela meri bilong em



Ol mama long Kostal Paipain eria bilong Ramu NiCo Projek i salem kaikai long maket we ol woklain i save baim.



Ol meri kisim skul long fud.



Ol mama wok kakao.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisinim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisin o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komyuniti'

NFA bai putim K1 milien long Enga pis faming

BIKEPela bel kirap nau i stap long lukautim pis insait long Enga Provins.

Memba bilong Wabag Open ilektoret, Robert Ganim i kirap no gut long lukim ol pipel bilong Sirunki i kirap pinis long brukim graun na redim ol pis wara bilong ol.

Ol pis fama i statim pinis Sirunki Pis Fama Kopretiv Sosaiti, tasol ol tokim memba olsem ol i gat liklik wari olsem ol giaman pis fama “tewel na pepa pis fama” i wok long kisim mani tru na ol i kisim nem nating.

Long ples Tugusenda, samting olsem 30 kilomita rot bilong Sirunki-Mulisos, i gat 12-pela pis wara i gat moa long 800 pis stok i stap na long ol narapela hap olsem Yaskom Risot Motel na Sirunki hai skul planti moa pis wara i stap.

Ol pis fama i amamas tru long harim olsem Nesenel Piseri Atoriti bai putim K1 milien i go long inlen pis fam projek long Enga provins long dispela yia.

Dispela em i namba wan taim bihain long planti yia long Enga bai kisim mani bilong em yet. Pastaim

Enga provins i save go aninit long Westen Hailans wantaim Jiwaka provins. Ol mani bilong Enga i kam long NFA i save go stret long ol hadwe haus long Maun Hagen na ol Enga pis fama i save go na kisim ol saplai long hap.

Tasol nau bai i no moa olsem. Ol pis fama bilong Enga i tok em i gutpela tok-save stret olsem ol i laikim ol matiriel na saplai bilong ol i mas stap long KTL hadwe bilong ol yet long Wabag taun na ol i ken go klostu tasol na kisim ol samting.

Ol Sentrel Provins skul kisim ol TV

Veronica Hatutasi i raitim

OL skul sumatin na tisa long ol skul long Sentrel Provins i kisim gutpela helpim na save long Enhensim o strongim Kwaliti long Tising aninit long Telivisen (EQUITV) Telivisen Progrem.

Gavman bilong Japan, aninit long Japanis Intenesenel Koporesen Ejensi (JICA) i sapotim dispela program olsem helpim bilong em long Edukesen Dipatmen, na tu, kamapim gut save long rit na rait na lainim bilong ol skul pikinini long PNG.

Ol bin statim EQUITV program long yia 2005 na Edukesen Dipatmen i lukim gutpela helpim we EQUITV Progrem i wok long kamapim long ol skul insait long ol provins i yusim dispeTV program.

Em ol provins olsem Sentral, Is Sepik, Bogenvil, Sauten Hailans, Westen Hailans na Nesenel Kapitell Distrik.

Long las wik, ol level C skul aninit long EQUITV program long Kairuku Hiri Ilek-

toret long Sentrel Provins i bin kisim 49 Telivisen set, ol DVD na ol narapela risos buk metiriel i kam long Sentrel Provinsal Gavman na Edministresen.

Dispela i bihainim ol Provinsal trena trening we ol tisa long 5-pela distrik i bin kisim long en.

EQUITV program i ran gut stret long ol Sentrel Provinsal skul na wantaim ol TV, DVD na ol risos buk, ol skul na tisa i ken skruim save na helpim i go moa yet.

Ol rekod i soim olsem 100 pesen skul long Sentrel Provins nau bai gat ol TV ikwipmen na ol ken yusim ol EQUITV program.

Bosmeri bilong PNG Edukesen Midia Senta we i wok wantaim JICA EQUITV Progrem i tok EQUITV Progrem i wok long go insait long 22 provins long kantri.

Em i tok Sentrel Provins em i wanpela paionia na modol provins long kisim dispela program na em i kisim edukesen i go long ol sumatin na tisa long planti skul long ol rurel eria.

Em i tok kisim lainim long TV i save kamapim planti gutpela samting na long wankan taim tu, ritim ol buk tu i narapela rot.

Olsem na em i gutpela long inves o putim mani long lainim bilong ol pikinini bikos bai yumi lukim gutpela kaikai long bihain taim.

Man husat i bin strongim ol Sentrel Provns skul long kisim EQUITV taim em i stap olsem Asisten Seketeri bilong Edukesen long Sentrel Provns, Titus Romano Hatagen, i tok EQUITV i bikpela samting long helpim na strongim save long rit na rait na lainim bilong ol pikinini.

Em i tok EQUITV i strongim tu kwaliti edukesen, lainim na tising na em i bihainim tu Visin 2050. Na em bin tok tenkyu i go long Sentral Provinsal Gavman long sapotim dispela program long ol skul bilong em long ol distrik.

I mas gat strongpela li-dasip long skruim dispela program i go long ol yia i kam.



Ol Tugusenda pis fama sanap klostu long ol pis wara bilong ol. Baksait L-R Kausila Robert Yuwan, Panda ipara, Pala Tupo, Bonipace David (hap bodi i hait) na Timothy Daniel. Fran (ol pikinini) L-R: Jayson Paul, Roselyn Soket, na Elis Paul. *Poto na Stori i kam long: CYRIL GARE.*

IPNGS i kisim helpim long nupela buk

INSTITUT bilong PNG Stadis (IPNGS) i kisim gren o helpim mani inap long K54,000 i kam long Christensen Fan long mekim ol wok bilong em.

IPNGS bai yusim dispela mani long wok bilong kamapim ol musik instramen bilong PNG.

Ektong Dairekta na Senia Etnomusiolojis bilong Institut, Dokta Don Niles i tok long planti yia, Musik Dipatmen bilong IPNGS i wok long dokumenim ol tumbuna musik bilong PNG.

Em i tok Institute i gat planti tausen piksa slaid na olo poto we i soim ol pipel i yusim ol kain musik instramen na ol dispela nau i stap long koleksen bilong IPNGS.

Em i tok wantaim dispela mani i kam long Christensen Fan, Musik Dipatmen bai baim wanpela profesenel slaid skena na ol arapela tul long divelpim gut ol piksa na

poto i go long gutpela mak.

Ol bai apgretim tu ol kompyuta samting na ol poto bilong ol musik instramen i stap na ol dispela bai ol i kisim long ol musium na ol pesenel koleksen na ol institusen long kantri na ovasis.

Dokta Niles i tok dispela poto buk ol bai kamapim long kala na bai gat moa long 1,000 poto, na Edukesen Dipatmen bai yusim tu. Em i tok mani ya bai helpim institut long baim ol profesenel kamera long kisim ol poto na raun i go long ol ples we ol festival i kamap long ol.

Dokta Niles i tok dispela buk bai soim ol kain pasin tumbuna na ol kontemporeri musik instramen ol pipel i yusim long dispela kantri.

Buk ya bai kamap olsem gaid long luksave long ol kain musik instramen ol kain kalsa long PNG i gat, ol i save yusim long wanem rot, ol saun ol i mekim, sanap bi-

long ol long pasin tumbuna na long ol wanem rijon ol i yusim ol.

Ol bin statim Christensen Fan long 1957 olsem wanpela praivet faundesen long San Francisco, Amerika. Em i wanpela NGO na wok bilong en em long promotim na lukautim ol kain klasa i mas stap laip yet.

Dokta Niles i tok stat yet long 1981-1996, Fan i bin sapotim ol risets wok long baiodaivesiti long PNG.

PNG i wanpela long ol kantri long Melanesia we Christensen Fan i mekim wok long en.

Ol narapela ples em Mexico, Australia, Sentral Asia na Turkey, sautwes Amerika, San Franceso Bay eria na Rift Veli long Afrika.

IPNGS i luksave long gutpela sapot we Christensen Fund i givim bikos dispela i soim tu luksave we Fund i gat long en.



Tupela sumatin bilong wanpela skul long Kairuku Hiri Distrik, Sentral Provins i kisim wanpela long ol bikpela flet TV skrin long yusim long EQUITV Progrem long skul bilong ol. *Poto: Veronica Hatutasi*



OL woklain bilong Musik Dipatmen bilong IPNGS wantaim Catherine Sparks bilong Christensen Fund husat i bin raun lukim ol na givim ol helpim mani. L-R: Naomi-Faik Simet, Catherine Sparks, Gedisa Jacob, Dokta Don Niles na Edward Gende. *Poto: IPNGS*



Germany autim Brazil

...Redi long gren fainel

OL manmeri bilong Brazil i bin mekim bikipela haus krai long dispela wik taim Germany i kamap wantaim wanpela bikipela win long semi fainel.

Germany i no bin givim wanpela sans long Brazil long skoa long namba wan hap na skoa long hap taim i bin stap 5-0.

Kosa bilong ol Germany, Joachim Low i tok ol i no bin ting olsem ol bai kamapim wanpela bikipela win.

Em i tok ol i bin ting Brazil bai givim ol wanpela strongpela pilai tasol ol i kirap nogut long kisim

wanpela gutpela risal.

Dispela win bilong Germany long Brazil em i wanpela nupela rekot na kosa bilong ol Germany i tok dispela em i opim rot bilong ol Yurop kantri long winim ol soka kantri bilong Saut Amerika.

Straika bilong Germany, Miroslav Klose, i kamapim nupela rekot long dispela Wol Kap olsem wanpela pilaia long skoim planti gol long Wol Kap.

Kosa bilong Germany i tok em i amamas long em bikos em i bin pilai strong long kisim dispela gutpela risal.

Midfil bilong Germany, Toni Kross, em i bin kisim Man of the Match awod long dispela semi fainel pilai.

Kross i tok em i no bilip olsem ol i ken winim Brazil 7-1 long Brazil. Em i tok ol i bin trening na pilai strong, na long dispela as, ol i lukim kaikai bilong en.

Germany gat bikipela tingting long kamap ol wol sempion bilong Wol Kap long dispela yia na ol i redi long pilai long gren fainel.

Stori na poto i kam long FIFA websait



Kosa bilong ol Brazil i wari long lus long Germany.



Wanpela pilaia bilong Germany na Brazil i resis long kisim bal.

Trukai givim K500, 000 long Tim PNG

Isaac Liri i raitim

TIM PNG husat bai pilai long Komonwelt Gem long Skotland long dispela mun i kisim K500, 000 sek mani long Trukai Indastri long dispela wik.

Trukai Indastri i bin givim sek mani i go long Papua Niugini Olimpik Komiti (PNGOC), ogenaísesen we i save go pas long lukautim ol etlit bilong kantri.

Presiden bilong PNGOC, Sir John Dawanincura, i amamas tru long sapot blong Trukai Indastri na tok em i gat bilip olsem ol spot manmeri bilong Papua Niugini bai pilai strong na mekim ol spona na ol pipel bilong kantri i amamas.

Baset bilong salim tim PNG i go long Skotland em

K3 milien, na Gavman bilong Papua Niugini i givim K1.5 milien tasol long helpim Tim PNG. Arapela K1.5 milien i kam long sapot bilong ol spona olsem Trukai.

Greg Worthington, Sif Eksekutiv Opisa (CEO) bilong Trukai, i tok Trukai i amamas long sapotim Tim PNG bikos spot em i wanpela samting we i bihainim ol bikipela tingting bilong kampani bilong ol.

Bikipela tingting bilong ol em long kamapim helti laipstail insait long kantri.

Mista Worthington i tok dispela K500, 000 em i kam long Trukai Fan Ran.

Em i tok Fan Ran bilong dispela yia i bin kamap gut tru na em i tok tenk yu long olgeta kampani, pablik na ol wok manmeri bilong Trukai husat i bin givim taim bilong

ol long soim sapot.

Em i tok bikipela sapot bilong ol manmeri long Fan Ran bilong dispela yia i soim olsem ol i sapotim Tim PNG, na ol i laikim Tim PNG long winim sampela medal.

Sampela bilong ol memba bilong tim PNG i lusim kantri pinis. Ol dispela memba em ol spot manmeri long Triathlon, Judo na Ragbi sevens. Olgeta memba bilong tim PNG bai lusim kantri long namba 15 de bilong dispela mun.

Maus meri bilong tim PNG long go long Komonwelt Gems, Emma Waiwai, i tok dispela yia em namba wantaim bilong Papua Niugini long salim tim wantaim planti manmeri i go long Komonwelt Gems. I gat 96-pela etlit na 46-pela opisal.



Maus meri bilong Tim PNG i go long Komonwelt Gems, Emma Waiwai wantaim tupela memba bilong Tim PNG, CEO bilong Trukai, Greg Worthington, na Presiden bilong PNGOC, Sir John Dawanincura. Poto: Nicky Bernard.

Badihagwa winim skul kriket pilai

Isaac Liri i raitim

LONG anda 19 na 17 divisen bilong Gol Naget skul kriket pilai bilong ol mangi na meri long Pot Mosbi, Badihagwa Sekonderi Skul i bin soim strong bilong ol na winim pilai long wan wan divisen.

Dispela kompetisen i bin kamap long wanpela wik olgeta, na i bin kamap long holide taim bilong ol sumatin, na dispela i bin pulim planti ol yangpela long wan wan skul insait long Mosbi i kam bung long lukim dispela pilai.

Maski san i bin hat, ol mangi na meri bilong Badihagwa i bin soim trupela kala bilong ol long pilai kriket taim olgeta i kwalifai long pilai long fainels.

Ol arapela skul husat i bin kwalifai long pilai long ol fainel em Marianville na Della Sale. Dispela tupela skul i bin pilai strong tu na i bin mekim ol mangi na meri bilong Badihagwa i fret.

Long gren fainel pilai long olgeta divisen, ol Badihagwa i bin strong tumas long ol skul bilong Bomana na autim

olgeta.

Gem Developmen Menesa bilong Cricket PNG, Gayan Loku, i tok em i amamas tru long lukim ol yangpela i salens namel long ol yet.

Em i tok Cricket PNG i bin lukim planti pilaia husat i gat talen na ol bai helpim ol long developim talen bilong ol long kamap ol gutpela kriket pilaia long taim bihain.

Mista Loku i tok tenk yu long olgeta sumatin na tisa bilong olgeta skul husat i bin givim sapot bilong ol long dispela junia kompetisen.



Badihagwa anda 19 tim bilong ol mangi.

Badihagwa anda 19 tim bilong ol meri.

Gutpela pasin mas stap long taim bilong Pasifik Gems

GAVANA bilong Nesenel Kapital Distrik (NCD), Powes Parkop, i bin toktok strong long ol pipel bilong NCD long soim gutpela pasin long taim bilong 2015 Pasifik Gems.

Em i tokim ol manmeri husat i bin stap long Jack Pidik Pak long Pot Mosbi olsem em i laikim ol long helpim gavman na Gems Ogenaising Komiti (GOC).

Gavana Parkop i tok sapos ol pipel bilong NCD i helpim, dispela bikipela pilai bai kamap gut, na ol manmeri husat i kam long ol arapela Pasifik kantri bai amamas. Na taim ol i go bek long wan wan ples bilong ol, ol bai tokim ol arapela wantok bilong ol long gutpela pasin ol manmeri bilong Papua Niugini i soim long ol.

Em i tok ol pipel bilong NCD mas lukim ol yet olsem ol impoten manmeri bikos ol tasol bai go pas long lukautim ol wan solwara bilong yumi long taim ol i kam stap.

Gavana Parkop i tok dispela bikipela pilai bai givim sans long yumi ol pipel bilong

Papua Niugini long soim kalsa bilong yumi tu. Dispela bai helpim yumi long strongim kalsa long dispela nupela taim we teknoloji em i bikipela tru.

Pasifik Gems bai kamap long wankain taim we Papua Niugini bai amamasim 40 yia long stap olsem wanpela inpenden kantri. Na Gavana Parkop i laikim ol pipel long luksave long dispela, na lus tingting long bikhet na bagarapim dispela bikipela amamas.

Gavana Parkop i tok Gavman bilong Papua Niugini i putim bikipela sapot long kamapim wanpela gutpela Pasifik Gems.

“Mani mak gavman i givim long kamapim dispela bikipela pilai em K2 bilien,” Gavana Parkop i tok.

Em i tok gavman i putim planti mani tu long stretim ol rot insait long Pot Mosbi bikos gavman i les long trefik i kamap wanpela asua long taim bilong dispela bikipela pilai.

Gavana Parkop i tok ol

pipel bilong dispela kantri bai benefit long ol dispela infrastraksa bihain long Pasifik Gems, na em i tokim ol pipel olsem ol i mas lainim long lukautim.

“Mani mak gavman i givim long stretim ol rot na Flai ova rot insait long Pot Mosbi em K1.3 bilien,” Gavana Parkop i tok.

Gavana Parkop i tokim ol pipel tu long no ken sapotim Papua Niugini tasol. Em i tok sampela bilong yumi long Papua Niugini i mas sapotim ol arapela Pasifik ailan kantri.

Em i tok olsem bikos em i laikim ol wan solwara bilong yumi long pilim spirit bilong wan rijon na wan famili.

Long pinisim toktok bilong em, Gavana Parkop i tokim ol pipel husat i save salim ol samting long rejista sapos ol i laik mekim bisnis long dispela taim.

Em i tokim ol long lukautim gut ol rabis bilong ol long dispela taim.

“Pot Mosbi i mas stap klin long taim bilong Pasifik Gems,” Gavana Parkop i tok.



Gavana Parkop i toktok long ol manmeri long Jack Pidik Pak long Pot Mosbi.

Pasifik Gems kam klostu nau

Isaac Liri i raitim

MINISTA bilong Spot, Justin Tkatchenko na Gavana bilong Nesenel Kapital Distrik (NCD) Powes Parkop i bin mekim opisal kaun daun bilong 2015 Pasifik Gems long Pot Mosbi long las wik.

Minista Tkatchenko i tok dispela kaun daun seremoni em i impoten, long wanem, em i soim ol manmeri bilong Papua Niugini, na ol manmeri bilong ol arapela Pasifik ailan kantri olsem gavman bilong Papua Niugini na Gems Ogenaising Komiti (GOC) i redi long dispela bikipela pilai.

Minista Tkatchenko i tok em i laikim ol pipel bilong Papua Niugini na NCD long mekim kaun daun bikos em bai helpim ol long redi gut bipo long dispela bikipela pilai i kamap.

Em i tok PNG gavman i putim moa long K1 bilien long sapotim spot, na em i laikim

ol manmeri long givim sapot bilong ol long mekim dispela bikipela pilai i kamap gut.

Minista Tkatchenko i tok olgeta spot fasiliti bai pinis long Epril long neks yia. Em i tokim ol pipel olsem wok kontraksen long sanapim ol spot fasiliti i ran gut.

“Olgeta spot fasiliti i pinis long mak bilong 60 pesen. Long Disemba, ol bai pinis long mak bilong 90 pesen,” Minista Tkatchenko i tok.

Em i tok gavman i no laikim ol pipel bilong Papua Niugini long amamas wantaim ol dispela nupela fasiliti tasol.

Em i tok gavman i laikim Papua Niugini long winim planti medal na kamap semption bilong 2015 Pasifik Gems.

Opisal maskot bilong 2015 Pasifik Gems, Tura the Kokomo, i bin stap long mekim kaun daun wantaim Gavana Parkop, Minista Tkatchenko, na ol manmeri.



Minista bilong Spot, Justin Tkatchenko na Gavana bilong NCD, Powes Parkop i mekim kaun daun bilong 2015 Pasifik Gems wantaim wanpela elektronik masin.

Digicel givim K50, 000 long PNGPC

DIGICEL i givim wanpela sek mani inap long K50, 000 i go long Papua Niugini Paralimpik Komiti(PNGPC) long dispela wik.

Khattar Fehmi bilong Digicel i tok ol i amamas long givim dispela sapot na ol bai go het long sapotim PNGPC long nau na long taim bihain.

Mista Fehmi i tok Digicel i save laik long sapotim spot bilong ol manmeri husat i gat disabiliti olsem na ol i save wok klostu wantaim PNGPC.

Dokta Ma bilong PNGPC i amamas tru long kisim sapot long Digicel na em i tok ol bai yusim dispela mani long helpim ol taim ol i go long Komonwelt Gems long Skotlan long dispela mun.

Digicel i givim mobail fon tu i go long ol memba bilong



Dokta Ma bilong PNGPC na Khattar Fehmi bilong Digicel i sanap wantaim sek mani Digicel i givim PNGPC.

PNGPC. mobail fon bai helpim ol long namel long ol komiti na ol strongim komyunikesen etlit.

- Ol Weekend Spot Dro -

  			
Week 14	Home	Away	Venue
13-Jul	Wigmen	Tigers	Mt Hagen
13-Jul	Gurias	Muruks	Kokopo
13-Jul	Micks	Vipers	Lae
13-Jul	Lahanis	Lions	Kundiawa
13-Jul	Isapea	Eagles	Mt Hagen

SP Pot Mosbi Ragbi Lig Dro: Raun 6		
12 th -13 th July		
West	Vs	Maiari Eagles
Magani	Vs	Tarangau
Kone Storm	Vs	Defence
Butterflies	Vs	D/Warriors
Hawks	Vs	Royals
Kone Tigers	Vs	Paga
Brothers	Vs	Hohola
Souths	Bye	



SPOTS DRO

RAUN 18

Fraide: Julai 11, 2014



7.45pm
Brookvale Oval
S/Eagles V^s W/Tigers



Sarare: Julai 12, 2014

5.30pm
Mt. Smart Stadium
Warriors V^s Eels



7.30pm
AAMI Park
Storm V^s Bulldogs



Sande: Julai 13, 2014

2.00pm
Cbus Super Stadium
Titans V^s Raiders



3.00pm
Remondis Stadium
Sharks V^s Knights



Mande: Julai 14, 2014

7.00pm
Sportingbet Stadium
Panthers V^s Broncos



Bai

Rabbitohs, Cowboys, Dragons na Roosters

Raun 17 Points Lata

Pos	Tim	W	B	L	D	Pts
1.	Panthers	10	2	5		24
2.	Sea Eagles	10	2	5		24
3.	Bulldogs	10	2	5		24
4.	Rabbitohs	9	1	7		20
5.	Roosters	9	1	7		20
6.	Broncos	8	2	7		20
7.	Warriors	8	2	7		20
8.	Storm	8	2	7		20
9.	Eels	8	2	7		20
10.	West Tigers	8	1	8		18
11.	Dragons	8	1	8		18
12.	Titans	7	1	8		18
13.	Cowboys	6	2	9		16
14.	Raiders	4	2	11		12
15.	Knights	4	2	11		12
16.	Sharks	4	2	11		12

QRL Intrust Super Cup draw

Round 19 (12-13 July)		
Home	Vs	Away
Tweed		PNG
Ipswich		Souths
Pride		Bye
Mackay		Burleigh
Sunshine Coast		Redcliffe
Wynnum		Capras
Norths		Easts

Ol Stet ov Orijin gem namba 3 eksen poto



RABIS TAKOL: NSW kepten Paul Gallen bai stap long ripot bihain long em i mekim rabis takol long prop bilong Maroons, Nate Myles.



TRAI TAIM: Ol Maroons i amamas bihain long Billy Slater skoim trai.

Bikpela senis long lain ap bilong Hunters

Isaac Liri i raitim

Kepten Israel Eliab bai pilai long fulbek, Adex Wera husat i save pilai long fulbek bai pilai long senta, Lawrence Tu'u husat i save pilai long risev bai pilai long fes 13 long huka, na Jason Tali husat i bin kam insait long skwat long tupela wik i go pinis bai pilai long

wing.

Ol Hunters i lus long laspela tripela gem bilong ol, na long dispela as, Marum i tok dispela bikpela senis i ken helpim ol long win.

Em i tokim ol pilaia bilong em long putim tingting bilong ol long gem, na lus tingting long lus bilong ol long ol wik i go pinis.

Long las wik taim ol Hunters i bin malolo, ol i bin gat wanpela bung. Long dispela bung ol pilaia i bin toktok i go i kam na ol i luksave long wanem hap ol i mas lukluk long en long strongim bek gen pilai bilong ol.

Ol Hunters i luksave olsem ol i mas winim laspela 7-pela gem bilong ol long stap insait long top 5 na pilai long ol

fainel.

Tripela strongpela pilaia bilong ol Hunters, Esau Siune, Joe Bruno na Tiger Emere bai no inap long pilai long dispela wiken bikos tripela i kisim bagarap long bodi bilong ol.

Lain ap bilong ol long dispela wiken em 1. Israel Eliab 2. Garry Lo 3. Noel Zeming 4. Adex Wera 5. Jason Tali 6. Dion Aiye 7. Roger Laka 8. David Loko 9. Lawrence Tu'u 10. Brandy Peter 11. George Benson 12. Sebastian Pandia 13. Adam Korave 14. Wartovo Puara 15. Willie Minoga 16. Albert Patak 17. Timothy Lomai 18. Thompson Teteh 19. Stanton Albert 20. Edward Goma.

Kosa bai rausim tupela pilaia bipo long gem i stat.

Pos	Tim	W	B	L	D	Pts
1.	Northern Pride	14	1	3	0	30
2.	East Tigers	10	2	5	1	25
3.	TH Seagulls	11	1	6	1	25
4.	WM Seagulls	11	1	6	0	24
5.	Ipswich Jets	11	1	6	0	24
6.	PNG Hunters	9	1	7	1	21
7.	Bears	8	1	8	1	19
8.	Magpies	7	2	9	0	18
9.	Devils	8	1	9	0	18
10.	Mackay Cutters	7	2	9	0	18
11.	Dolphins	6	2	9	1	17
12.	CQ Capras	3	2	12	1	11
13.	SCoast Falcons	0	1	17	0	2

* Northern Pride vs Eastern Tigers postponed to Sunday 6th July

Ol spot eksen poto long wiken...

Ol Poto Nicky Bernard.

Presiden bilong Papua Niugini Olimpik Komiti (PNGOC), Sir John Dawanincura, i sekan wantaim Sif Eksekyutiv Opisa bilong Trukai bihain long Trukai i givim K500, 000 long PNGOC.

Pilaia bilong Cosmos i traim long rausim bal taim pilaia bilong Golo kam klostu long em long supa lig soka resis bilong ol man long Bisini soka graun long Mosbi.



Pilaia bilong Uni wantaim bal i givim bek sait long pilaia bilong Global Eagles long pilai bilong ol meri long Bisini.



B gret ragbi yunien eksen long Monian pak long Mosbi, olgeta fainai bai kamap long dispela wiken.





Maroons kisim namba 3

QUEENSLAND Maroons i bin kamap wantaim wanpela bikpela win long pinisim Stet ov Orijin bilong 2014.

Long namba 5 minit bilong gem, Greg Inglis i bin inap long skoim namba wan trai bilong gem tasol difens bilong ol Blues i bin strong tumas na stopim em long putim trai.

Aidan Guerra i bin skoim wanpela trai long namba 15 minit tasol Johnathan Thurston i opsait na video referi i tok i no trai.

Ben Te'o bilong Maroons i bin mekim wanpela hai takol long Trent Hodgkinson long namba 22 minit bilong gem na dispela i bin lukim Trent Hodgkinson i kisim wanpela penalti gol na mekim skoa i kamap 2-0.

Long namba wan hap Maroons i bin gat planti sans long skoa tasol difens bilong ol Blues i bin strong tru.

Bipo long namba wan hap i pinis, Daley-Cherry Evans i bin brukim difens bilong ol Blues na mekim wanpela sotpela kik i go pundaun

long han bilong kepten bilong ol Maroons Cameroon Smith na em i skoa.

Skoa long hap taim i bin sanap 6-2.

Bihain long ol i go malolo na kam bek, ol Maroons i no givim sans long namba tu hap we i lukim wanpela naispela kat aut pas long Justin Hodges i go long Billy Slater long skoa.

Long namba 60 minit bilong gem, Greg Bird na Paul Gallen bilong Blues i bin mekim wanpela no gut takol long Nate Miles bilong Maroons na ol Maroons i kisim penalti gol long mekim skoa 14-2.

Long namba 62 minit bilong gem, Josh Dugan bilong Blues i bin putim wanpela trai na Trent Hodgkinson i kikim bal i go insait long gol pos na mekim skoa 14-8.

Bihain long dispela trai bilong Dugan, ol Maroons i no givim sans long ol Blues na skoim tripela trai olgeta long pinisim gem wantaim wanpela bikpela win 32-8.





PMV

DIESEL OIL



BOROKO MOTORS

PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552

Email: info@borokomotors.com.pg
Website: www.boroko-motors.com

PMV OIL BILONG YUMI

BOROKO MOTORS